

唐書



二十一

高祖諸子列傳第四

唐書七十九

唐書七十九

高祖二十二子竇皇后生建成太宗皇帝玄霸元吉萬貴妃生智雲莫嬪生元景孫嬪生元昌尹德妃生元亨張氏生元方郭婕妤生元禮宇文昭儀生元嘉及第十九子靈夔王才人生元則張寶林生元懿張美人生元軌楊美人生鳳劉婕妤生元慶崔嬪生元裕小楊嬪生元名楊嬪生元祥魯才人生元曉柳寶林生元嬰隱太子建成小字毗沙門資簡弛不治常檢荒色嗜酒畋獵無度所從皆博徒大俠隋末高祖被詔捕賊汾晉間畱建成護家居河東高祖已起兵密召與元吉赴太原隋人購之急從間道至授左領軍大都督封隴西郡公引兵略定西河從平京師唐國建爲世子開府置官屬又遷撫軍大將軍爲東討元帥將萬人徇洛陽授尚書令高祖受禪立爲皇太子詔率將軍桑顯和擊司竹羣盜平

之涼州人安興貴殺李軌以衆降詔趣原州應接建成素驕不恤士雖盛暑晝夜馳獵衆不堪其勞亾者過半帝欲其習事乃敕非軍國大務聽裁決之又以李綱鄭善果爲宮官參謀議稽胡劉仝成寇邊詔建成進討破之鄜州斬虜千計引渠長悉官之使還招羣胡仝成與它大帥降建成畏其衆給欲城州縣者使降胡操築陰勒兵殺六千人仝成奔梁師都嘗循行北邊遇賊四百出降悉誡其耳縱之中允王珪洗馬魏徵以帝初興建成不知謀而秦王數平劇寇功冠天下英豪歸之陰許立爲皇太子勢危甚會劉黑闥亂河北珪等進說曰殿下特以嫡長居東宮非有功德爲人所稱道今黑闥夷叛殘孽衆不盈萬利兵鏖之唾手可決請往討因結山東英俊心自封殖建成遂請行黑闥敗洛水建成問徵曰山東其定乎對曰黑闥雖敗殺傷太甚其魁黨皆縣名處死妻子係虜欲降無繇雖有赦令獲者必戮不大蕩有恐殘賊嘯結民未可安旣而黑闥復振廬江王瑗棄洛州山東亂命齊王元吉討之有詔降者赦罪衆不信建成至獲俘皆撫遣之百姓欣悅賊懼夜奔兵追戰黑闥衆猶盛乃繼囚使相告曰穢而甲還鄉里苦妻子獲者旣已釋矣衆乃散或縛其渠長降遂禽黑闥帝晚多內寵張婕妤奸尹德妃最幸親戚分事宮府建成與元吉通謀內結妃御以自固當是時海內未定秦王數將兵在外諸妃希所見及洛陽平帝遣諸妃馳閱後宮見府庫服玩皆私有求索爲兄弟請官秦王已封帑簿及官爵非有功不得妃媛曹怨之會爲陝東道行臺有詔屬內得專處決王以美田給淮安王神通而張婕妤爲父丐之帝手詔賜田詔至神通已前得不肯與婕妤曰詔賜妾父田而王奪與人帝怒召秦王讓曰朕詔令不如爾教邪他日謂裴寂曰兒

久典兵爲儒生所譏非復我昔日子秦府屬杜如晦騎過尹妃父門恚其傲率家童摔毆折一指父懼卽使妃前訴秦王左右暴其父帝不察大怒詰王曰兒左右乃凌我妃家況百姓乎王自辨曉訖不置繇是見疏帝召諸王燕秦王感母之不及有天下也偶獨泣帝顧不樂妃媛因得中傷之爲建成游說曰海內無事陛下春秋高當自娛秦王輒悲泣正爲嗔忌妾屬耳使陛下萬歲後王得志妾屬無遺類東宮慈愛必能全養乃皆悲不自勝帝惻然遂無易太子意突厥入寇帝議遷都秦王苦諫止建成見帝曰秦王欲外禦寇沮遷都議以久其兵而謀篡奪帝寢不悅初帝令秦王居西宮承乾殿元吉居武德殿與上臺東宮晝夜往來皆攜弓刀相遇如家人禮由是皇太子令秦齊二王教與詔敕雜行內外懼莫知所從建成等私募四方驍勇及長安惡少年二千人爲宮甲屯左右長林門號長林兵又令左虞候率可達志募幽州突厥兵三百內宮中將攻西宮或告於帝帝召建成責謂乃流志嵩州華陰楊文幹素凶詖建成昵之使爲慶州總管遣募兵送京師欲爲變時帝幸仁智宮秦王元吉從建成謂元吉曰秦王且徧見諸妃彼金寶多有以賂遺之也吾安得箕踞受禍安危之計決今日元吉曰善乃命郎將尒朱瑗校尉橋公山齋甲遺文幹趣興兵煥等懼至幽鄉白反狀寧州人杜鳳亦上變帝遣司農卿宇文穎驛召文幹元吉陰結穎使告文幹文幹遽率兵反帝以建成首謀未忍治卽詔捕王珪魏徵及左衛率韋挺舍人徐師暮左衛車騎馮世立欲殺之以薄太子罪乃手詔召建成建成懼不敢往師暮勸遂舉兵詹事主簿趙弘智諫建成損車服輕往謝罪乃詣行在所未至屏官屬徑入謁叩頭請死投身於地不能起帝怒夜囚幕中使兵

衛守會文幹陷寧州帝驚以宮近賊夜率衛士南趣山行十餘里
明乃還宮召秦王問討對曰文幹豎子耳官司當卽禽之就使假
刻漏之久正須遣一將可辦帝曰事連建成恐應者衆爾自行還
吾以爾爲太子使建成王蜀蜀地狹不足爲變若不能事汝取之
易也秦王率衆趣寧州文幹爲其下所殺以其首降執宇文穎送
京師秦王之行元吉及內嬖更爲建成請封德彝亦陰說帝由是
意解復詔建成居守但責兄弟不相容而謫王珪韋挺天策兵曹
參軍杜淹於遠方然怨猜日結建成等召秦王夜宴毒酒而進之
王暴疾絡血數升淮安王扶掖還宮帝問疾因敕建成秦王不能
酒母夜聚又謂秦王曰吾起晉陽平天下皆爾力將定東宮爾亟
讓故成而美志又太子立多歷年吾重奪之觀而兄弟終不相下
同在京師忿鬪且深爾還洛陽行臺自陝以東悉主之建天子旌
旗如梁孝王故事主泣曰非所願也不可遠膝下帝曰陸賈漢臣
也猶遞過諸子況我天下主東西兩宮思汝卽往何所悲邪王將
行建成等謀曰秦王得土地甲兵必爲患畱之京師一匹夫耳因
密使人說帝言秦王左右皆山東人聞還洛皆灑然喜觀其意不
復來矣事果寢俄而突厥寇邊太子薦元吉北討欲因其兵作亂
長孫无忌房玄齡杜如晦尉遲敬德侯君集等勸秦王先圖之王
乃密奏建成等與後宮亂因曰臣無負兄弟今乃欲殺臣是爲世
充建德復仇使臣死雖地下愧見諸賊帝大驚報曰旦日當窮治
而必早參張婕妤語建成乃召元吉謀曰請勒宮甲託疾不朝
建成曰善然不共入朝事何繇知遲明乘馬至玄武門秦王先至
以勇士九人自衛時帝已召裴寂蕭瑀陳叔達封德彝宇文士及
竇誕顏師古等入建成元吉至臨湖殿覺變遽反走秦王隨呼之

元吉引弓欲射不能毅者三秦王射建成卽死元吉中矢走敬德
追殺之俄而東宮齊府兵三千攻玄武門閉不得入接戰久之矢
及殿屋王左右數百騎至合擊之衆遂潰帝謂裴寂等曰事今奈
何蕭瑀陳叔達曰臣聞內外無限父子不親失而弗斷反蒙其亂
建成元吉自草昧以來未始與謀旣立又無功德疑貳相濟爲蕭
墻憂秦王功益天下內外歸心立爲太子付軍國大務陛下釋重
負矣帝曰此吾志也乃召秦王至尉撫之曰朕幾有投杼之惑秦
王號泣不能止建成死年三十八長子承宗爲太原王早卒承道
安陸王承德河東王承訓武安王承明汝南王承義鉅鹿王皆坐
誅詔除建成元吉屬籍其黨疑懼更相告廬江王瑗遂反乃下詔
建成元吉瑗支黨不得相告訐由是遂安太宗立追封建成爲息
王諡曰隱以禮改葬詔東宮舊臣皆會帝於宜秋門哭之以子福

爲後十六年追今贈宇文穎者代人自李密所來降爲農圃監封
化政郡公性貪昏與元吉厚善故豫文幹謀事敗帝責曰朕以文
幹叛故遣卿乃同逆邪穎無以對斬之

衛懷王玄霸字大德幼辯惠隋大業十年薨年十六無子武德元
年追王及諡又贈秦州總管司空以太宗子泰爲宜都王奉其祀
葬芷陽泰徙封越更以宗室西平王瓊子保定嗣薨無子國除

巢刺王元吉小字三胡高祖兵巴西畱守太原封姑臧郡公進齊
國總十五郡諸軍事加鎮北將軍太原道行軍元帥帝授禪進王
齊爲并州總管初元吉生太穆皇后惡其貌不舉侍媪陳善意私
乳之及長猜鷲好兵居邊久益驕侈常令奴客諸妾數百人被甲
習戰相擊刺死傷甚衆後元吉中創善意止之元吉恚命壯士拉
死私諡慈訓夫人劉武周略汾晉詔遣右衛將軍宇文歆助守元

吉喜鷹狗出常載置罔三十車曰我寧三日不食不可一日不獵
夜潛出淫民家府門不閉歆驟諫不納乃顯表於帝曰王數出與
竇誕縱獵蹂民田縱左右攘斂畜產爲盡每射於道觀人避矢以
爲樂百姓怨毒不可與共守有詔召還元吉密諷民詣闕請乃得
歸武周以五千騎屯黃蛇嶺元吉使將軍張達以步卒百人嘗寇
達辭兵少彊之至則盡沒達怒導武周陷榆次元吉保祁賊急攻
之遁還并州賊張甚元吉給司馬劉德威曰公以老弱守吾率銳
士拒賊因齎寶物攜妻妾夜出委軍奔京師并州陷帝怒自是嘗
令從秦王征討不復顯軍矣尋授侍中襄州道行臺尚書令稷州
刺史秦王圍東都竇建德來援王以精騎逆戰畱元吉屈突通守
而世充易之輒出兵元吉設伏劫之斬首人百級禽其將東都平
拜司空賜袞冕服鼓吹二部班劍二十人黃金二千斤與太子秦

王得三鑪鑄錢累進司徒兼侍中并州大都督時秦王有功而太
子不爲中外所屬元吉喜亂欲并圖之乃構於太子曰秦王功業
日隆爲上所愛殿下雖爲太子位不安不早討還踵受禍矣請爲
殿下殺之太子不忍元吉數諷不已許之於是邀結宮掖厚賂中
書令封德彝使爲游說帝遂疏秦王愛太子元吉乃多置亾命壯
士厚賜之使爲用元吉記室參軍榮九思爲詩刺之曰丹青飾成
慶玉帛禮專諸元吉見之弗悟也其典籤裴宣儼免官往事秦府
元吉疑事泄鳩殺之自是人莫敢言秦王嘗從帝幸元吉第伏護
軍宇文寶寢內將以刺王太子固止之元吉慍曰爲兄討於我何
害突厥郁射設入圍烏城建成薦元吉北討乃多引秦王府驍將
秦叔寶尉遲敬德程知節段志玄與行又籍秦兵精兵益麾下帝
知之不能禁元吉承間密請害秦王帝曰是有定四海功殺之無

名元吉曰王昔平東都顧望不卽西散金帛樹私惠豈非反邪帝不應太子與元吉謀兵行吾與秦王至昆明池伏壯士拉之以暴卒聞上無不信然後說帝付吾國吾以爾爲皇太弟而盡擊殺叔寶等率更令王暉密以謀告秦王王召僚屬謀皆曰元吉戾狠使得志且不能事其兄往者護軍辭寶以元吉字合之其文成唐元吉喜曰但除秦王取東宮如反掌耳爲亂未克已復傾奪大王不蚤正之社稷非復唐有秦王由是定計死年二十四子承業爲梁郡王承鸞漁陽王承獎普安王承裕江夏王承度義陽王竝伏誅貞觀初改葬追爵海陵郡王及諡後改封巢以曹王明嗣

楚哀王智雲初名稚諡善射工書齊隋大業末從建成寓河東高祖初建成走太原吏捕智雲送長安爲陰世師所害年十四武德元年追王及諡母萬貴妃性恭順爲帝所禮宮中事一二咨決三年以太宗子寬爲嗣又贈涼州總管司徒寬早薨國除貞觀二年復以濟南公世都子靈龜嗣歷魏州刺史爲政威嚴盜賊不發鑿永濟渠通新市百姓利之薨子福嗣降爲公卒子承況嗣神龍中爲右羽林將軍同節愍太子死于難

荆王元景武德三年始王趙與魯豐二王同封貞觀初累遷雍州牧十年徙封荆明年詔荆州都督荆王元景梁州都督漢王元昌徐州都督徐王元禮潞州都督韓王元嘉遂州都督彭王元則鄭州刺史鄭王元懿絳州刺史霍王元軌虢州刺史虢王鳳豫州刺史道王元慶鄧州刺史鄧王元裕壽州刺史舒王元名幽州都督燕王靈夔蘇州刺史許王元祥安州都督吳王恪相州都督魏王泰齊州都督齊王祐益州都督蜀王愔襄州刺史蔣王暉揚州都督越王貞并州都督晉王治泰州都督紀王慎所任州刺史并功

臣令世世襲會長孫无忌等固讓遂廢不行徙鄜州永徽初進位
司徒賜實封至千五百戶房遺愛謀反坐子則與往還繫獄時吳
王亦抵罪高宗謂大臣曰朕欲從公丐叔及兄死兵部侍郎崔敦
禮曰陛下雖申恩不可誦天下法遂賜死久之追封沈黎王以渤海
王奉慈子長沙嗣降爲侯神龍初復王爵以孫元逃嗣薨無子
國除

漢王元昌初王魯累遷梁州都督後徙封漢有勇力善騎射數觸
軌憲太宗手詔誨督乃怨望附太子承乾通饋謝來朝京師宿東
宮嘗有醜語又見帝側有宮人善琵琶乃曰事成幸賜我承乾許
之割臂血盟事敗帝弗忍誅欲免死高士廉李勣等固爭不奉詔
乃賜死國除

豐悼王元亨貞觀三年授金州刺史之藩太宗憐其幼思之數遣
使爲勞問賜金醖以娛樂之六年薨無子國除

周王元方武德四年始王與鄭宋荆滕四王同封貞觀三年薨無
子國除

徐康王元禮性恭畏善騎射始王鄭卽授鄭州刺史後徙王徐遷
徐州都督爲絳州刺史有治名璽書勞勉實封至千戶永徽中加
司徒兼潞州刺史薨贈太尉冀州大都督陪葬獻陵三子茂爲淮
南王餘爵公茂險薄無行初元禮疾姬趙有美色茂逼蒸之元禮
切責茂恚屏侍衛藥膳曰爲王五十年足矣何服藥爲以不食薨
茂嗣上元中事洩流死振州神龍初以茂子瓘嗣開元中爲宗正
員外卿薨子延年嗣拔汗那王入朝廷年將以女嫁之爲右相李
林甫劾奏貶文安郡別駕終餘杭司馬國除永泰初延年壻黔中
觀察使趙國珍言諸朝詔以其子諷嗣王

韓王元嘉字元嘉始王宋後改王徐爲潞州刺史母昭儀宇文述女也寵於高祖既卽位欲立爲后固辭元嘉以母寵故特爲帝愛後出諸子無及者在潞時年十五聞太妃病涕泣不食居喪毀甚太宗數尉勉少好學藏書至萬卷皆以古文字參定同異與弟靈夔友愛燕見終日如布衣禮闈門修整當世稱之貞觀九年更封韓遷滑州都督高宗末爲澤州刺史武后得政進授太尉徙定州刺史以霍王元軌爲司徒舒王元名爲司空滕王元嬰開府儀同三司魯王靈夔太子太師越王貞太子太傅紀王慎太子太保外示尊寵而內將圖之垂拱中元嘉徙絳州刺史與子譔及越王子冲糾合宗室同舉兵未發會武后詔宗室朝明堂元嘉遣使告諸王曰大享後太后必盡誅諸王不如先事起不然李氏無種矣乃爲中宗詔督諸王發兵冲卽以兵五千攻濟州而諸王倉卒兵不至遂敗元嘉至京師謀泄后逼令自殺年七十詔改氏元嘉魯王越王爲虺元嘉六子訓潁川王誼武陵王誡上黨公蚤卒譔黃公工爲辭章孟利貞嘗稱其文曰劉麟之周思茂不過也出爲通州刺史辭疾歸且謀應越王也誡通音律歷杭州別駕與譔俱死時籍没者衆惟冲譔家書爲多皆文句詳正祕府所不及神龍初追復元嘉爵土以第五子訥嗣薨子叔璩嗣歷國子司業薨子煒嗣建中中改王鄆後懿宗以鄆王卽位復改嗣韓王云

彭思王元則字彝初王荆出爲婺州刺史貞觀十年徙王爲遂州都督以冠服奢僭免久之爲澧州刺史更折節厲行薨贈司徒荆州大都督陪葬獻陵高宗登望春宮過其喪哭之慟無子以霍王子絢嗣龍朔中封南昌王薨子志疎嗣開元中爲宗正卿

鄭惠王元懿始王滕貞觀中出爲兗州刺史徙王歷鄭潞絳三州

刺史實封千戶喜經術數斷大獄務寬平高宗嘉之璽詔褒錫薨
贈司徒荊州大都督陪葬獻陵十子長子璿嗣王爲鄂州刺史薨
子希言嗣開元中爲右金吾大將軍再爲太子詹事弟察言生二
子曰自仙翱自仙爲楚州別駕生夷簡翱爲陳畱公生宗閔璿弟
琳安德郡公生擇言擇言生勉勉宗閔夷簡皆位宰相別有傳時
稱小鄭王後亦曰惠鄭王後以別鄭王亮云

霍王元軌武德六年始王蜀與豳漢二王同封後徙吳多材藝高
祖愛之太宗嘗問羣臣曰朕子弟孰賢魏徵曰臣愚不盡知其能
唯吳王數與臣言未嘗不自失帝曰朕亦器之然卿以爲前代孰
比對曰經學文雅漢河間東平也至孝行曾閔不能過帝由是遇
益厚詔納徵女爲妃常從獵遇羣豕帝使射之筈不虛彀豕爲盡
帝撫其背曰爾藝過人顧今無所施方天下未定得若豈不用乎

貞觀七年爲壽州刺史高祖崩去官毀瘠甚服除遂菜食布衣終
身至忌日輒累晝不食十年徙王歷絳徐定三州刺史實封至千
戶所至閉閣讀書以吏事委長史司馬謙慎未嘗與物忤數引見
處士劉玄平爲布衣交或問王所長於玄平答曰無長問者不解
玄平曰人有短所以見長若王無所不備吾何以稱之突厥寇定
州元軌令開城門偃旗幟虜疑不敢入夜遁州人李嘉運潛結賊
詔窮誅支黨元軌以寇近且強人心危但殺嘉運餘無所詰因自
劾帝喜曰朕固悔之非王之明幾失定州矣王文操者與賊戰敗
二子鳳賢更以身蔽父得全二子死縣抑不爲言元軌廉知之遣
使弔祭上其事詔贈鳳賢朝散大夫旌禮其閭元軌每朝敷上疏
陳得失多所裨正帝尊重之有大事常密驛咨逮帝崩與侍中劉
齊賢同知山陵事元軌淹練故事齊賢歎曰是非吾等及已嘗遣

國令督封租令請賀易取羸答曰汝當正吾失反誅吾以利邪不
納進司徒出爲襄青二州刺史越王敗坐嘗通謀徙黔州檻車載
至陳倉薨六子緒爲江都王純安定王餘皆爵爲公緒有名譽爲
金州刺史誅神龍初竝復官爵以緒孫暉嗣王開元中爲左千牛
員外將軍

虢莊王鳳字秀成始王鹵爲鄧州刺史俄徙王歷虢豫青三州刺
史實封千戶喜畋游遇官屬尤嫚使奴蒙虎皮怖其參軍陸英俊
幾死因大笑爲樂薨贈司徒揚州大都督陪葬獻陵七子長子翼
嗣爲平陽王薨子寓嗣寓無子爵不傳次子茂融以勇聞垂拱中
爲申州刺史黃公譔與越王謀舉兵倚以爲助時詔諸王公赴東
都茂融私問所親高子貢子貢報曰來必死乃稱疾不朝以俟兵
期及得越王書倉卒不能應僚屬勸白其書擢太子右贊善大夫

伊爲黨屬所引誅中宗更以鳳孫邕嗣主要韋后妹累遷祕書監
知隴右三使仗內諸廢徙王汴未幾韋氏敗邕殺其妻送首於朝
議者鄙之削爵貶沁州刺史不事後復爵還戶二百累遷衛尉卿
薨子曰嗣曰剛銳果決略通書史好屬辭天寶五載出爲西河太
守坐資給柳勣支黨貶義陽司馬明年御史中丞楊慎矜得罪其
附離史敬忠與巨善又坐免官錮置南賓郡召拜夷陵太守安祿
山陷東京玄宗方擇將帥張垧言巨有謀可屬大事召至京師楊
國忠忌之謂人曰小兒詎可使對天子踰月不得見帝知之召入
禁中對合旨帝大悅敕宰相與語久不得罷國忠怠謂巨曰比來
人多口打賊君不爾乎巨曰誰爲相公手打賊者乎乃授陳畱譙
郡太守攝御史大夫河南節度使明日謝帝驚曰何攝爲卽詔兼
御史大夫巨奏方艱難時賊多詐有如陛下召臣何以取信乃析

契授之俄兼統嶺南何履光黔中趙國珍南陽魯炅三節度使事
時炅戰數屈詔貶爲果毅以來瑱代之巨奏炅若能存孤城功足
補過則何以處之帝曰卿隨所處置巨至內鄉賊將畢思琛解圍
走遂趣南陽貶炅白衣從軍其暮稱詔復職京師平拜畱守兼御
史大夫明年拜太子少師兼河南尹東畿採訪使征乘牛之出入
市者斥所得佐用度然稍自盜沒其妃卽張皇后從女弟內不睦
巨選府縣官備使令妃亦引蒲博少年分黨招貨賄撓政事宗正
卿李遵素私張發巨賊事貶遂州刺史會段子璋反道遂州巨倉
卒不知所出卽迎謁爲子璋所殺子則之嗜學年五十餘尚執經
太學嗣曹王臯薦之貞元二年絲睦王府長史遷左金吾衛大將
軍坐與從甥竇申善貶昭州司馬

道孝王元慶始王漢後徙陳出爲趙州刺史貞觀十年徙王授豫

州刺史累實封千戶時諸王奉給薄於帝子至數窶乏大臣莫敢
言十八年黃門侍郎褚遂良爲太宗從容言之不能行高宗時歷
滑州刺史以治績聞數蒙褒賜遷徐沁衛三州刺史事母謹及喪
請躬修墳墓詔不聽薨贈司徒益州都督陪葬獻陵九子誘爲嗣
王臨淮爲澧州刺史坐贓削爵更以次子詢之子微嗣終宗正卿
子鍊嗣廣德中亦至宗正卿

鄧康王元裕貞觀五年始王鄒十一年徙王始王及徙皆與譙魏
許密四王同封累實封至千二百戶好學善談名理與典籙盧照
隣爲布衣交五爲州刺史遷兗州都督薨贈司徒益州大都督陪
葬獻陵無子以江王子廣平公炅嗣薨子孝嗣開元中爲冠軍大
將軍

舒王元名始王譙後徙王高祖之在大安宮太宗晨夕使尚宮問

起居元名纔十歲保媪言尚宮有品當拜元名曰此帝侍婢耳何拜爲太宗壯之曰真吾弟也及長矜嚴疏財未嘗問家人生業歷五州刺史實封至千戶子豫章王亶治江州有美政高宗以元名善訓子手詔褒善又欲授元名大州辭曰臣忝屬籍豈以州郡爲仕進資邪治石州二十年數游山林有高蹈意垂拱中徙鄭州境接東畿諸王貴戚爲刺史者縱家人暴百姓元名至一革之爲治廉威進加司空武后時亶爲丘神勣所構繫詔獄死元名坐遷利州尋被殺神龍初詔復官爵贈司徒時少子鄆國公昭已卒乃以亶子津嗣開元中爲左威衛將軍薨子萬嗣薨子藻嗣

魯王靈夔篤學善草隸通音律初王魏後王燕爲幽州都督已而徙王實封至千戶頻歷五州刺史遷太子太師垂拱元年徙相州坐與越王謀起兵流振州自殺子詵爲清河王早夭藹爲范陽王

知越王必敗白發其謀得不誅歷右散騎常侍爲酷吏所害神龍初悉追復王爵以藹子道堅嗣道堅方嚴有禮法閨門肅如也七爲州刺史遷國子祭酒開元中選授汴州刺史河南道採訪使州據水陸都會前後刺史多積利唯道堅以清毅稱入爲宗正卿薨贈禮部尚書子宇嗣從玄宗至蜀爲右金吾將軍寶應初皇太子子封魯王更封宇爲嗣鄒王弟道遂封戴國公恭默自守以修山東婚姻故事數任清職終尚書右丞

江安王元祥始王許後徙王四爲州刺史實封至千戶性庸遜所至營財產無厭時滕蔣虢三王皆貪暴得其府官者惡之不願行故時語曰寧向儋崖振白不事江滕蔣虢元祥魁大帶十圍食兼數人韓虢魏亦鴻偉然不逮也薨贈司徒并州大都督陪葬獻陵七子暉爲永嘉王有禽獸行誅死皎爲武陽王餘皆爵公武后時

多及誅皎子叢以幼流死嶺表葬南安人號其冢爲天孫墓中宗立以從子欽嗣王又以皎封絕更取弟子繼宗嗣旣而以郡王不襲降澧國公

密貞王元曉貞觀中爲虢州刺史實封至千戶徙澤州薨贈司徒揚州都督陪葬獻陵子穎嗣爲南安王薨子勗嗣早薨神龍初以穎弟亮養子曇嗣開元五年更詔元曉再從孫東莞郡公徹嗣徙封濮陽郡王歷宗正卿金紫光祿大夫

滕王元嬰貞觀十三年始王實封千戶爲金州刺史驕縱失度在太宗喪集官屬燕飲歌舞狎昵廝養巡省部內從民借狗求置所過爲害以九彈人觀其走避則樂城門夜開不復有節高宗以書切責曰朕以王至親不忍致于法今署下上考冀媿王心久之遷洪州都督官屬妻美者給爲妃召逼私之嘗爲典籤崔簡妻鄭媪

以履抵元嬰面血流乃免元嬰慙歷旬不視事後坐法削戶及親事帳內之半謫置滁州起授壽州刺史徙隆州復不循法錄事參軍事裴聿諫正其失元嬰粹辱之聿入計具奏帝遷聿六品上階帝嘗賜諸王綵五百以元嬰及蔣王貪贖但下書曰滕叔蔣弟不須賜給麻二車助爲錢緡二王大慙武后時進拜開府儀同三司梁州都督薨贈司徒冀州都督陪葬獻陵子十八人長子修琦嗣爲長樂王餘爵公垂拱中六人死詔獄神龍初更以少子修信干涉嗣開元中授左驍衛將軍薨子湛然嗣從玄宗至蜀擢左金吾將軍

不暇故人入以爲賢而莫之察後過惡熾聞宮中若孔和遠令狐德棻于志寧張玄素趙弘智王仁表崔知微等皆天下選每說爭

襲降禮因公

晉執軍

千越開元中封武縣郡軍襲于其然開封文宗至晉武金
 關為其樂王領糧公垂封中六人及信熾輸輸更以少子封
 同樂州清晉襲韻同封冀州清晉割華熾劉于十人人及于封
 不貳期餘和二車阻為益祿二王大德左言部義我開初同三
 習帝嘗顯前王祿正百以示嬰及陳王貪顯且不書曰劉妹陳策
 參軍車斐車藉五其夫示嬰外私之事人信具奏帝遷車六品上
 賤車劫內之半蘭置錄州步封壽州陳史封劉州封不制去為車
 其心與外示嬰而血燕以京示嬰慈烈自不厥車封坐去情只

太宗諸子列傳第五

西川中鳳樓氏開國南

唐書八十

太宗十四子文德皇后生承乾又生第四子泰高宗皇帝後宮生
 寬楊妃生恪又生第六子愔陰妃生祐王氏生暉燕妃生貞又生
 第十一子囂韋妃生慎後宮生簡楊妃生福楊氏生明

常山愍王承乾字高明生承乾殿即以命之武德三年始王常山
 郡與長沙宜都二王同封俄徙中山太宗即位立為皇太子甫八
 歲特敏惠帝愛之在諒闇使裁決庶政有大體後每行幸則令監
 國及長好聲色慢游然懼帝祕其迹臨朝言諄諄必忠孝退乃與
 羣不逞狎慢左右或進諫危坐斂容痛自咎飾非辨給諫者拜荅
 不暇故人人以為賢而莫之察後過惡漫聞宮臣若孔穎達令狐
 德棻于志寧張玄素趙弘智王仁表崔知機等皆天下選每規爭
 承乾帝必厚賜金帛欲以厲其心承乾傲不悛往往遣人陰圖害

之時魏王泰有美名帝愛重而承乾病足不良行且懼廢與泰交惡泰亦謀奪長各樹黨東宮有俳兒善姿首承乾嬖愛帝聞震怒收兒殺之坐死者數人承乾意爲泰告望甚內念兒不已築室圖其象贈官樹碑爲起冢苑中朝夕祭承乾至其處裴回涕數行下愈怨懟稱疾不朝累數月又使戶奴數十百人習音聲學胡人椎髻翦絲爲舞衣尋橦跳劍鼓鞞聲通晝夜不絕造大銅鑪六熟鼎招亾奴盜取人牛馬親視烹燂召所幸羣養共食之又好突厥言及所服選貌類胡者被以羊裘辮髮五人建一落張氈舍造五狼頭纛分戟爲陣繫幡旗設穹廬自居使諸部斂羊以烹抽佩刀割肉相啗承乾身作可汗死使衆號哭務面奔馬環臨之忽復起曰使我有天下將數萬騎到金城然後解髮委身思摩當一設顧不快邪左右私相語以爲妖又樂氈爲錦列丹幟勒部陣與漢王元

作明版

昌分統大呼擊刺爲樂不用命者披樹扶之或至死輕者輒腐之嘗曰我作天子當肆吾欲有諫者我殺之殺五百人豈不定又召壯士左衛副率封師進刺客張師政紇于承基等謀殺魏王泰不克遂與元昌侯君集李安儼趙節杜荷纜臂血唾之謀以兵入西宮貞觀十七年齊王祐反齊州承乾謂承基等我宮西牆去大內正可二十步棘耳豈與齊州等會承基連齊王事繫獄當死卽上變帝詔長孫无忌房玄齡蕭瑀李勣孫伏伽岑文本馬周褚遂良雜治廢爲庶人徙黔州十九年死帝爲廢朝葬以國公禮子象爲懷州別駕厥鄂州別駕開元中象子適之爲宰相贈還承乾始王象越州都督郇國公

承乾孫適之

楚王寬武德三年出後楚哀王蚤薨貞觀初追封
鬱林王恪始王長沙俄進封漢貞觀二年徙蜀與越燕二王同封

不之國久乃爲齊州都督帝謂左右曰吾於恪豈不欲常見之但令早有定分使外作藩屏吾百歲後庶兄弟無危亾憂十年改王吳與魏齊蜀蔣越紀六王同徙封授安州都督帝賜書曰汝惟茂親勉思所以藩王室以義制事以禮制心外之爲君臣內之爲父子今當去膝下不遺汝珍而遺汝以言其念之哉坐與乳媪子博塞罷都督削封戶三百高宗卽位拜司空梁州都督恪善騎射有文武才其母隋煬帝女地親望高中外所向帝初以晉王爲太子又欲立恪長孫无忌固爭帝曰公豈以非已甥邪且兒英果類我若保護舅氏未可知无忌曰晉王仁厚守文之良主且舉棊不定則敗況儲位乎帝乃止故无忌常惡之永徽中房遺愛謀反因遂誅恪以絕天下望臨刑呼曰社稷有靈无忌且族滅四子仁瓊琨境竝流嶺表顯慶五年追王鬱林爲立廟以河間王孝恭孫榮爲

鬱林縣侯以嗣神龍初贈司空備禮改葬光宅中仁遇赦還適會榮以罪斥故得襲鬱林縣男歷岳州別駕爵郡公嘗使江左州人遺以金拒不內武后遣使者勞曰兒吾家千里駒更名千里自天授後宗室賢者多株翦唯千里詭躁不情數進符瑞諸異物得免中宗反正改王成紀未幾進王成節愍太子誅武三思千里與其子天水王禧率數十人斬右延明門以入太子敗誅死籍其家改氏蝮睿宗立詔還氏及官爵璿蚤卒中宗追封朗陵王子祗出繼蜀王愔開元中以傍繼國改封廣漢郡王遷太僕卿同正員薨琨武后時歷六州刺史皆有名聖曆中爲嶺南招慰使安輯反獠甚得其宜卒贈司衛卿神龍初贈張掖郡王開元中以子禕貴追封吳王

禕少有志尚事繼母謹撫異母弟祗以友稱當襲封固讓祗中宗

祗明作
琨本連

嘉其意特封嗣江王以繼焉後開元時亦以傍繼徙信安郡王累為州刺史治嚴辦遷禮部尚書朔方節度使初吐蕃據石堡城數盜塞詔禕與河西隴右議攻取既到屯諏日進師或謂城險賊所愛必固守今兵深入有不如不捷吾軍必犇不如持重伺賊勢禕曰人臣之節豈憚險不進乎必衆寡不敵者吾以死繼之於是分兵迨賊路督諸將倍道進遂拔之自是河隴諸軍游弈拓地至千里玄宗喜更號其城曰振武軍契丹牙官可突于叛詔拜忠王為河北道行軍元帥討之敕禕以副王不行故禕率裴耀卿諸將分道出范陽北擊二蕃破之禽酋長以還餘部竄伏加開府儀同三司領關內支度營田採訪處置使授二子官禕功多執政害之賞不讎為當時所恨久之擢兵部尚書為朔方節度大使坐事下除衢州刺史歷滑懷二州天寶初以太子少師致仕明年遷太師未拜

薨禕治家嚴教子有法度故岺嶧峴皆顯

岺性質厚歷官有美名以王孫封趙國公楊國忠亂政悉斥不附已者岺由考功郎中拜睢陽太守以清簡為二千石最方入計而玄宗入蜀卽走行在除武部侍郎兼御史大夫俄拜蜀郡太守劔南節度採訪使郭千仞反與陳玄禮共討平之上皇還京遷戶部尚書改越國乾元元年持節都統江淮節度宣慰觀察使都統之號自岺始明年宋州刺史劉展有異志詔拜展為淮南節度使密詔岺與揚州長史鄧景山圖之時展強扈既受詔卽悉兵度淮岺景山拒之戰壽春敗績岺走丹楊詔貶袁州司馬卒于官贈揚州大都督弟峴別傳

祇封嗣吳王出為東平太守安祿山反河南陳畱滎陽靈昌相繼陷祇募兵拒賊玄宗壯之累遷陳畱太守持節河南道節度採訪

使歷太僕宗正卿代宗大曆時祇旣宗室老以太子賓客爲集賢院待制是時勲望大臣無職事者皆得待詔于院給殮錢署舍以厚其禮自左僕射裴冕等十三人爲之子嚙以蔭補五品官祇薨兄岾得罪乃以嚙嗣王累至宗正卿檢校刑部尚書薨贈太子少保性介直面刺人短歷官清白居室不能庇風雨收恤甥姪慈愛過人家無畱儲公卿合賻乃克葬瓊神龍初封歸政郡王歷宗正卿坐千里事貶南州司馬

濮恭王泰字惠褒始王宜都徙封衛繼懷王後又徙封越爲揚州大都督再遷雍州牧左武侯大將軍改王魏帝以泰好士善屬文詔卽府置文學館得自引學士又以泰大腰腹聽乘小輿至朝司馬蘇勗勸泰延賓客著書如古賢王泰乃奏撰括地志於是引著作郎蕭德言祕書郎顧胤記室參軍蔣亞卿功曹參軍謝偃等撰

次衛尉供帳光祿給食士有文學者多與而貴游子弟更相因藉門若市然泰悟其過欲速成乃分道計州緝緝疏錄凡五百五十五篇歷四碁成詔藏祕閣所賜萬段後帝幸泰延康坊第曲赦長安死罪免坊人一年租府僚以差賜帛又泰月稟過皇太子遠甚諫議大夫褚遂良諫曰聖人尊嫡卑庶謂之儲君故用物不會與王共之庶子不得爲比所以塞嫌萌杜禍源先王制法本諸人情知有國家者必有嫡庶庶子雖愛不得過嫡子如當親者疏當尊者卑則私恩害公惑志亂國今魏王稟料過東宮議者以爲非是昔漢竇太后愛梁王封四十餘城王築苑三百里治宮室爲複道費財鉅萬出警入蹕一不得意遂發病死宣帝亦驕淮陽王幾至於敗輔以退讓之臣乃克免今魏王新出閣且當示以節儉自可在後月加歲增又宜擇師傅教以謙儉勉以文學就成德器此所謂

聖人之教不肅而成也帝又敕泰入居武德殿侍中魏徵亦言王
爲陛下愛子欲安全之則不當使居嫌疑之地今武德殿在東宮
之西昔海陵居之矣論者爲不可雖時與事異人之多言尚或可
畏又玉之心亦弗遑舍願罷之成王以寵爲懼之美帝悟乃止時
皇太子承乾病寒泰以計傾之乃引駙馬都尉柴令武房遺愛等
布腹心而韋挺杜楚客相繼攝府事二人者爲泰要結中朝臣津
介賂遺羣臣更附爲朋黨承乾懼陰遣人稱泰府典籤詣玄武門
上封帝省之書言泰罪帝怒卽遣捕詰不獲旣而太子敗帝陰許
立泰岑文本劉洎請遂立泰爲太子長孫无忌固欲立晉王帝以
太原石文有治萬吉復欲從无忌泰微知之因語晉王爾善元昌
得无及乎王憂甚帝怪之以故對帝憮然悟會召承乾譴勒承乾
曰臣貴爲太子尚何求但爲泰所圖與朝臣謀自安爾無狀之人

遂教臣爲不軌事若泰爲太子正使其得計耳帝曰是也有如立
泰則副君可詭求而得使泰也立承乾治俱死治也立泰承乾可
無它卽幽泰將作監解雍州牧相州都督左武侯大將軍降王東
萊因詔自今太子不道藩王窺望者兩棄之著爲令然帝猶謂无
忌曰公勸我立雉奴雉奴仁懦得無爲宗社憂奈何雉奴高宗小
字泰尋改王順陽居均州之勛鄉帝常持泰表語左右曰泰文辭
可喜豈非才士我心念泰無已時但爲社稷計遣居外使兩相完
也二十一年進王濮高宗卽位詔泰開府置僚屬車服羞膳異等
薨鄖鄉年三十五贈太尉雍州牧二子欣徽欣嗣王武后時爲酷
吏所陷貶昭州別駕薨子嶠神龍初得嗣王開元中爲國子祭酒
以罪貶鄧州別駕薨徽封新安郡王

庶人祐字贊武德八年王宜陽進王楚又王燕已乃封齊領齊州

都督貞觀十一年始歸國明年入朝以疾留京師其舅尚乘直長
陰弘智儉人也說祐曰王兄弟多卽止萬歲後何以自全要須得
士自助乃引客燕弘信謁祐祐悅賜金帛使募劍客十五年還州
初帝用王府長史司馬必取骨鯁敢言者有過失輒聞而祐溺羣
小好弋獵長史薛大鼎屢諫不聽帝以輔王無狀免之更用權萬
紀萬紀性剛急以法繩祐有咎君暮梁猛虎者騎射得幸萬紀斥
之祐私引與狎昵帝數以書讓祐萬紀恐并獲罪卽說祐曰王上
愛子上欲王改悔故數教責王誠能飭躬引咎萬紀請入朝言之
上意宜解祐因上書謝罪萬紀見帝言祐且自新帝悅厚賜萬紀
而仍譙戒祐祐聞萬紀見勞而已蒙責以爲賣已益不平會萬紀
又以疑貳繫君暮等制祐不出國門悉暴祐罪于朝祐不勝忿有
詔刑部尚書劉德威臨訊頗實帝召祐萬紀還京師祐與燕弘亮
等謀射殺萬紀支解之左右勸祐遂發兵乃募城中男子年十五
以上悉發私署左右上柱國光祿大夫開府儀同三司托東托西
等王斥庫貲行賞驅人築堞浚隍繕甲兵人惡之皆夜縋亾去詔
兵部尚書李勣與劉德威發便道兵討之祐日夜引弘亮等五人
對其妃宴樂語官軍則弘亮妄言王毋憂右手持酒啗左手刁拂
之祐信愛弘亮聞之喜帝手救祐曰吾常戒汝勿近小人正爲此
耳往吾子今國讎我上慙皇天下愧后土題畢涕而遣祐檄諸縣
縣輒以聞祐窮蹙上表曰臣帝子也爲萬紀讒構上天降靈罪人
斯得臣狂失心恟怳驚悸左右無兵卽欲顛走所以頗仗械以自
衛護時勣未至而青淄等州兵已集或勸祐虜子女走豆子航爲
盜計未決兵曹杜行敏夜勒兵鑿垣入祐與弘亮等閉門拒至日
中行敏呼曰吾爲國討賊不速降且焚士積薪祐乃出執送京師

賜死內侍省貶爲庶人葬以國公禮詔齊州給復一年擢行敏巴州刺史封南陽郡公祐喜養鬪鳴方未反狸齧鴨四十餘絕其頭去及敗牽連誅死者凡四十餘人祐之亂州人羅石頭數祐罪以刀直前刺祐不克殺之詔贈亳州刺史嘗引騎徇邑聚野人高君狀曰上親平寇難土地甲兵不勝計今王以數千人爲亂猶一手搖泰山又如君父何祐擊禽之愧其言不能殺詔擢榆杜令蜀悼王愔貞觀五年始王梁與郗漢申江代五王同封徙王蜀實封八百戶出爲岐州刺史數畋游爲非法帝頻責教不悛怒曰禽獸可擾於人鐵石可爲器愔曾不如之乃削封戶及國官半徙魏州久之還戶增至千復出馳弋敗民稼典軍楊道整叩馬諫愔拚擊之御史大夫李乾祐劾愔罪高宗怒貶黃州刺史擢道整匡道府折衝都尉吳王恪得罪愔以母弟廢爲庶人徙巴州俄封涪陵

王薨咸亨初復爵土贈益州大都督陪葬昭陵以子璠嗣王璠武

后時謫死歸誠州神龍初以朗陵王禕子瑜嗣

蔣王暉始王郟又徙王蔣拜安州都督賜實封千戶永徽三年徙梁州暉造器物服玩多至四百車所經州縣騷然護送爲有司劾奏詔貸不問上元中遣箕州刺史錄事參軍張君徹誣告暉反詔使者按驗暉惶懼自殺高宗知其枉斬君徹贈暉司空荊州大都督陪葬昭陵三子煒煌休道煒初王汝南郡暉薨遂嗣王爲武后所害神龍初以嫡孫紹宗爲嗣蔣王薨子欽福嗣爲率更令煌封蔡國公孫之芳有令譽安祿山奏爲范陽司馬祿山反自拔歸京師歷工部侍郎太子右庶子廣德初詔兼御史大夫使吐蕃被畱二歲乃得歸拜禮部尚書改太子賓客休道子璠神龍初封嗣趙王開元中改王中山

越王貞始王漢後徙原已乃封越貞善騎射涉文史有吏幹爲宗
室材王武后初遷累太子太傅豫州刺史中宗廢居房陵貞乃與
韓王元嘉及王子黃公譔魯王靈夔王子范陽王藹霍王元軌王
子江都王緒及子琅邪王沖計議反正垂拱四年明堂成悉追宗
室行享禮共疑后遂大誅戮不遺種事且急譔乃矯帝璽書賜沖
曰朕幽繫諸王宜卽起兵於是命長史蕭德琮募兵告諸王師期
八月沖先發諸王莫有應者獨貞將兵攻上蔡破之而沖已敗貞
稍徇屬縣得士七千列五營貞爲中營以裴守德爲大將軍領中
營趙成美爲左中郎將領左營閔弘道爲右中郎將領右營安摩
訶爲郎將領後軍王孝志爲右將軍領前軍以韋慶禮爲司馬署
官五百然脅誘無鬪志家童皆佩符以辟兵九月右遣左豹韜衛
大將軍麴崇裕夏官尚書岑長倩率兵十萬討之以鳳閣侍郎張
光輔爲諸軍節度乃下詔削貞父子屬籍改氏虺崇裕等次豫州
貞少子規及裴守德拒戰兵潰貞乃閉門守守德者驍勇士貞始
起以女妻之委以腹心至是欲殺貞自贖會軍薄城家人白貞今
事乃爾王豈受戮辱者邪卽仰藥死規自殺守德與主俱縊起凡
二十日敗始貞臨水自鑿不見其首惡之未幾及禍沖貞長子也
好學勇而才累遷博州刺史初發有士五千度河趣武水武水令
告急魏州州遣莘令馬玄素領兵先乘城沖攻之因風積薪焚其
門火作風反衆心沮解其屬董元寂誦言王與國家戰乃反爾沖
斬以徇衆懼遂潰唯家僮數十從之乃走博州爲當關刺死后命
丘神勣討之兵未至沖已死起七日敗二弟萇温萇常山公坐死
温以前告流嶺南初貞騰檄壽州刺史趙瓌諭以興兵且假道瓌
得檄許爲應妻常樂長公主亦趣諸王蚤立功故瓌與主皆死濟

州刺史薛顛與其弟紹謀應沖率所部庸調治兵募士沖敗下獄死顛駙馬都尉瓘之子母城陽長公主封河東縣侯紹尚太平公主擢累右玉鈐衛員外將軍以主壻不加戮餓死河南獄神龍初敬暉等奏沖父子死社稷請復爵土爲武三思等沮罷開元四年乃復爵土有司諡死不忘君曰敬五年又詔王嗣絕國除朕甚悼焉其以貞從孫故許王子夔國公琳嗣王奉王祀琳薨爵不傳貞最幼息珍子謫嶺表數世不能歸開成中女孫持四世喪北還求耐王瑩詔嘉憫敕宗正寺京兆府爲訪其兆非陪陵者聽葬女名元真爲道士

紀王慎始王申後徙紀食戶八百貞觀中遷襄州刺史以治當最天子璽書勞勉人爲立石頌德二十三年進戶至千文明初累遷太子太師貝州刺史慎少好學善星步與越王齊名當世號紀越初貞連諸王起兵慎知時未可獨拒不與合將就誅而免改氏虺載以檻車謫巴州薨于道七子續琮獻秀獻欽證續與秀最知名續王東平歷和州刺史薨琮義陽王獻楚國公秀襄陽郡公獻廣化郡公欽建平郡公五人竝爲武后所殺神龍初以證嗣王擢左驍衛將軍薨子行同嗣琮三子行遠行休始琮與二弟同死桂林開元四年行休請身迎柩旣至無封樹議者謂不可復得行休歸地布席以祈是夜夢王乘舟舟判爲二旣而適野見東洲中斷乃悟焉又靈堂鎖一夕莖自屈管上有指迹一奇二竝使卜人筮之曰屈於文爲尸出指者示也一奇二竝三殯也先王告之矣乃趣其所發之如言而一節獨闕行休號而寢夢琮告曰在洛南洲明日直殯南得之於是以三喪歸陪葬昭陵贈琮陳州刺史永昌時行遠行芳斥嶠州六道使至行遠先就戮行芳幼當赦抱持

請代遂與俱死西南人稱寬悌云慎女東光縣主始八歲聞慎有疾不食父哀之給云已愈主察顏色未平終不肯御內外稱之長適太子司議郎裴仲將時妃主多恃貴以奢豫相矜主獨儉素姊弟誚曰人生富貴在得志獨勤苦欲何求答曰我幼好禮今行之不違非得志謂何且自古賢妃淑女以恭遜著名驕縱敗德況榮寵貴盛儻來物也可恃以凌人乎及王死號慟嘔血數升免喪絕膏沐者二十年始諸王妃主自垂拱後被害者皆蒙掩之神龍初詔州縣普加求訪祭以牲牢復官爵諸王皆陪葬昭獻二陵主聞感慟卒救其子曰爲我謝親戚酷憤已雪下見先王無恨矣中宗爲舉哀章善門下詔褒揚

江殤王闈封之明年薨無後

代王簡已封薨無後

趙王福貞觀十三年始王出後隱太子遷累梁州都督實封八百戶薨贈司空并州都督陪葬昭陵無子神龍初以蔣王暉孫思順嗣王

曹王明母本巢王妃帝寵之欲立爲后魏徵諫曰陛下不可以宸嬴自累乃止貞觀二十一年始王曹累爲都督刺史高宗詔出後巢王永隆中坐太子賢事降王零陵徙黔州都督謝祐逼殺之帝聞悼甚黔官吏皆坐免景雲中陪葬昭陵三子俊傑備俊嗣王南州別駕傑爲黎國公垂拱時竝及誅神龍初以傑子胤爲嗣曹王是時諸王子孫自嶺外還入見中宗皆號慟帝爲泣下初武后時壯者誅死幼皆沒爲官奴或匿人間庸保至是相繼出帝隨屬遠近封拜云後備自南還詔停胤封而封備歷衛尉少卿同正員薨開元十二年復封胤薨子載嗣位左衛率府中郎將子臯嗣

臯字子蘭少補左司禦兵曹參軍天寶十一載嗣王事母太妃鄭以孝聞安祿山反奉母逃民間間走蜀謁玄宗由都水使者遷左領軍將軍上元初臯歎臯祿不足養請補外不許乃故抵輕法貶溫州長史俄攝州事州大饑發官粟數十萬石賑餓者僚史叩庭請先以聞臯曰人日不再食且死何俟命後發哉苟殺我而活衆其利大矣既貸乃自劾優詔開許就進少府監時殿中侍御史李鈞與其弟京兆法曹參軍鐸宦旣遂不肯還鄉母窮不自給臯行縣見之歎曰入則孝出則悌有餘力則學若二子者可與事君乎哉舉劾之並錮死召還未得見卽上書言治道詔授衡州刺史爲觀察使謾劾貶潮州會楊炎起道州爲宰相知臯直復用爲衡州刺史初御史覆訊臯懼憂其母出則囚服入乃衣冠貌言如平常及爲潮以遷入告至是復位乃言其實建中元年進拜湖南觀察使前帥辛京杲貪虐使部將王國良戍武岡賴其富卽劾以死國良恐據縣反斂荆黔洪桂兵討之再歲不能下臯至遺書曰觀將軍非敢大逆者特逃讒抗死爾將軍遇我可以降我固爲京杲誣者幸蒙雪何忍以兵加將軍哉以爲不然我以陣術破將軍陣以攻法屠將軍城非將軍所度也國良得書喜且畏因請降然內尚首鼠臯卽日單騎稱使者造國良壘賊延使者入臯大呼其軍曰有識曹王者乎乃我也來受良降今安在一軍愕始不敢動國良迎拜叩頭請罪臯執手約爲良弟則盡焚攻守具散其兵有詔赦之賜名惟新明年持母喪至江陵會梁崇義反奪爲左衛大將軍復觀察湖南李希烈反遷江西節度使受命日不宿家至豫章大令將吏曰有功未申與懷器謀不發者皆自言得裨校伊慎李伯潛劉旻悉補大將擢王鐔爲中軍以馬彞許孟容爲幕府治戰

艦裒兵二萬以士二千五百委慎等教之自將五百人教以秦兵團力法聯其賞罰弛張如一乃約以五百人擊慎卒二千五百莫能當其鋒卽盡以教之初慎嘗從希烈平襄州至是希烈懼爲臯用卽反間德宗信之將誅慎臯請赦之使自效會與賊夾江陣臯勉慎立功以所乘馬及器鎧賜之使將先鋒斬賊數百級乃免賊柵蔡山不可攻臯聲言西取蘄引兵艦循崖泝江上賊聞以羸師保柵悉軍行江北與臯直西去蔡山三百里臯遣步士悉登舟順流下攻蔡山拔之間一日賊救至遂大敗乃取蘄州降其將李良平黃州兵益振會舒王爲元帥授臯前軍兵馬使俄而天子狩奉天鹽鐵使包佶爲陳少游所窘以運艚泝江次蘄口希烈使杜少誠將步騎三萬將絕江道臯遣伊慎兵七千禦于永安走之以功進工部尙書帝駐梁州臯之貢助相望以天子處外乃不敢居城府出屯西塞山大洲徙郡縣爲軍市改戶部尙書又遣伊慎王錡攻安州未下希烈遣劉戒虛以步騎八千援之臯命李伯潛迎擊於應山俘之遂下安州斬僞刺史王嘉祥希烈別遣兵援隋州臯破之屬鄉因下平靜白雁關賊遂不敢南略遷荆南節度使賜實封三百戶凡戰大小三十二取州五縣二十斬首三萬三千僉生萬六千未嘗敗師所過不致焚桑棗踐禾稼朝廷仰食江淮而西道出九江至大別皆與賊接臯轉戰數千里餉路遂通江漢倚臯爲固淮西平乃請護喪歸東都帝走中人賜弔訖葬來朝還就鎮初江陵東北傍漢有古鄣不治歲輒溢臯修塞之得其下良田五千頃規江南廢洲爲廬舍構二橋跨江而流入自占者二千餘家繇荆抵樂鄉二百里其間墟聚凡數十不并飲臯始命鑿井以便人貞元初吳少誠擅蔡故徙臯鎮山南東道割隋汝以益軍練兵

峙糧市回鶻馬以益戰騎歲時大敗以教士少誠畏之臯性勤儉能知人疾苦參聽微隱盡得吏下短長其賞罰必信所至常平物估豪舉不得擅其利教爲戰艦挾二輪蹈之鼓水疾進駛于陣馬有所造作皆用省而利長以物遺人必自視衡量庫帛皆印署以杜吏謾扶風馬彝未知名臯讓之卒以正直稱張柬之有園圍在襄陽臯嘗宴集將市取之彝曰漢陽有中興功今遺業當百世共保奈何使其子孫鬻乎臯謝曰主吏失詞以爲君羞微君安得聞此言卒年六十贈尚書右僕射諡曰成臯嘗自創意爲歌器以髮木上出五觚下銳圍爲盂形所容二豆少則水弱多則彊中則水器力均雖動搖乃不覆云子象古道古

象古元和中自衡州刺史擢安南都護貪縱不法驩州刺史楊清者蠻酋也象古忌其豪召爲牙門將常鬱鬱思亂會討黃賊象古發甲助之乃授清兵三千清與子志烈還襲安南殺象古并其家詔赦清爲瓊州刺史以桂仲武爲都護清拒命仲武分諭渠酋兵皆附破城斬清夷其族

道古舉進士獻書闕下擢校書郎集賢院學士累遷司門員外郎歷利隋唐陸四州刺史柳公綽鎮鄂岳爲飛譖上聞憲宗欲代之裴度言嗣曹王臯嘗能以江漢兵制李希烈威惠在人今以其子將必有功會道古自黔中觀察使入朝乃代公綽倍道入其軍公綽惶遽出財貲皆被奪元和十二年攻申州破其郛進圍中城守卒夜驅女子登而謀發懸門以出道古衆亂多死於賊李聽守安州未嘗敗道古誣逐之自將出木陵關士卒驕不能制又度支錢道古恣以饋權倖故賜不給其下怨怒戰不其力賊亦易之故再入申不能下卒無功淮西不加檢校御史大夫召爲宗正卿左金

吾將軍帝喜服餌道古欲自媚而所善柳泌自謂能化金為不死藥乃因宰相皇甫鏞以聞俄會帝崩穆宗為太子惡之既立誅泌貶鏞斥道古為循州司馬終以服丹歐血死長慶初詔還其官道古巧于宦便佞傾下游公卿間常與弈博偽不勝厚進所償嗜利者多得其權心故少盜美名及死賣宅以葬

太宗明子列傳第五終

唐書八十一

唐書八十一

三宗諸子列傳第六

唐書八十一

唐書八十一

高宗八子後宮劉生忠鄭生孝楊生上金蕭淑妃生素節武后生弘賢中宗皇帝睿宗皇帝

燕王忠字正本帝始為太子而忠生宴宮中俄而太宗臨幸詔宮臣曰朕始有孫欲共為樂酒酣帝起舞以屬羣臣在位皆舞賚賜有差貞觀二十年始王陳永徽初拜雍州牧王皇后無子后舅柳奭說后以忠母微立之必親已后然之請于帝又奭與褚遂良韓瑗長孫无忌于志寧等繼請遂立為皇太子后廢武后子弘甫三歲許敬宗希后旨建言國有正嫡太子宜同漢劉彊故事帝召見敬宗曰立嫡若何對曰正本則萬事治太子國本也且東宮所出微今知有正嫡不自安竊位而不自安非社稷計帝曰忠固自讓敬宗曰能為太伯不亦善乎於是降封梁王梁州都督賜甲第實

封戶二千物二萬段俄徙房州刺史忠寢懼不聊生至衣婦人衣備刺客數有妖夢嘗自占事露廢爲庶人因黔州承乾故宅麟德初宦者王伏勝得罪於武后敬宗乃誣忠及上官儀與伏勝謀反賜死年二十二無子明年太子弘表請收葬許之神龍初追封又贈太尉揚州大都督

原悼王孝承徽元年始王許與杞雍二王同封早薨神龍初追封及諡

澤王上金始王杞承徽三年遙領益州大都督歷郾壽二州刺史武后疾其母故有司誣奏削封邑徙置澧州久之之后陽若可喜者表杞王上金鄱陽王素節聽朝集義陽宣城二公主各增夫秩由是上金爲沔州刺史素節岳州刺史然卒不朝高宗崩詔上金素節二公主赴哀文明元年徙王畢又徙王澤歷五州刺史載初中

武承嗣諷周興誣上金素節謀反召繫御史獄上金聞素節已被殺卽雉經七子竝流死顯州神龍初追還官爵以子義珣嗣王義珣始被謫匿身爲傭保而嗣許王權利其爵邑告義珣假冒復流嶺外開元初以素節子璆爲後而王真公主表義珣實上金子乃奪璆爵復使義珣嗣王拜率更令薨子懋嗣

許王素節始王雍授雍州牧方羈非卽誦書日干言師事徐齊聃淬勉自彊帝愛之轉歧州刺史更王解母被譖死出素節爲申州刺史乾封初詔素節病無入朝而實不病乃著忠孝論自明倉曹參軍張柬之以聞欲帝省其誣武后滋不悅坐受昧降王鄱陽削封戶什七徙置袁州錮終身儀鳳三年爲岳州刺史更王薨又徙王歷三州刺史與上金同追逮赴都道聞遭喪哭者謂左右曰病死何可得而須哭哉至龍門驛被縊年四十三葬以庶人禮子瑛

等九人竝誅惟琳瓊瓌欽古尚幼長囚雷州中宗復位追故封又
贈開府儀同三司許州刺史陪葬乾陵詔瓊嗣王實封戶四百開
元初封琳爲嗣越王瓌嗣澤王琳至右監門衛將軍子隨封夔國
公瓊爲衛尉卿以抑上金子不得封貶鄂州別駕因詔外繼嗣王
者皆歸宗乃以嗣江王祥爲信安王嗣蜀王瑜爲廣漢王嗣密王
徹爲濮陽王嗣曹王臻爲濟國公嗣趙王琚爲中山王武陽王繼
宗爲澧國公瓊累遷太子詹事薨贈蜀郡大都督二子解需皆幼
以瓌子益嗣天寶十四載解始襲王瓌初封嗣澤王降爲郢國公
官宗正光祿卿進封褒信王初張九齡撰龍池頌刊石興慶宮宗
子以爲不稱盛德更命瓌爲頌建花萼樓北天寶初復拜宗正卿
性兄弟聰敏宗子有一善無不薦延故宗室在省闈者多瓌所啓
薨贈江陵郡大都督二子謙爲郢國公梓州刺史與汝南郡公欽

古封巴國公子賁嗣

孝敬皇帝弘永徽六年始王代與潞王同封顯慶元年立爲皇太
子受春秋左氏於率更令郭瑜至楚世子商臣弒其君喟而廢卷
曰聖人垂訓何書此邪瑜曰孔子作春秋善惡必書褒善以勸貶
惡以誠故商臣之罪雖千載猶不得滅弘曰然所不忍聞願讀它
書瑜拜曰里名勝母曾子不入殿下睿孝天資黜凶悖之迹不存
視聽臣聞安上治民莫善於禮故孔子稱不學禮無以立請改受
禮太子曰善四年加元服又命賓客許敬宗右庶子許圜師中書
侍郎上官儀中舍人楊思儉卽文思殿擿采古今文章號搖山玉
彩凡五百篇書奏帝賜物三萬段餘臣賜有差又詔五日一赴光
順門決事總章元年釋采國學請贈顏回爲太子少師曾參太子
少保制可會有司以征遼士亾命及亾命不卽首者身殊死家屬

沒官弘諫以爲士遇病不及期或被略若溺壓死而軍法不因戰
亾則同隊悉坐法家曰亾命而家屬與真亾者同沒傳曰與殺不
辜寧失不經臣請條別其科無使淪胥詔可帝幸東都詔監國時
關中飢弘視廡下兵食有榆皮蓬實者悄然命家令寺給米義陽
宣城二公主以母故幽掖廷四十不嫁弘聞貽惻建請下降武后
怒卽以當上衛士配之由是失愛又請以同州沙苑分假貧民會
納妃裴而有司奏費用白雁適苑中獲之帝喜曰漢獲朱雁爲樂
府歌今得白雁爲婚贊婚乃人倫首我則無慙禮畢曲赦歧州帝
嘗語侍臣弘仁孝賓禮大臣未嘗有過而后將騁志弘奏請數佛
旨上元二年從幸合璧宮遇魃薨年二十四天下莫不痛之詔曰
太子嬰沈瘵朕須其痊復將遜于位弘性仁厚旣承命因感結疾
日以加宜申往命諡爲孝敬皇帝葬緱氏墓號恭陵制度盡用天
子禮百官從權制三十六日釋服帝自製衣睿德紀刻石陵側營陵

明板
功字

功費鉅億人厭苦之投石傷所部官司至相率亡去妃薨諡哀皇
后無子永昌初以楚王隆基嗣中宗立詔以主祔太廟號義宗開
元中有司奏孝敬皇帝宜建廟東都以諡名廟詔可於是罷義宗
號妃卽裴居道女有婦德而居道以死故拜內史納言歷太子少
保翼國公爲酷吏所陷下獄死

章懷太子賢字明允容止端重少爲帝愛甫數歲讀書一覽輒不
忘至論語賢賢易色一再誦之帝問故對曰性實愛此帝語李世
勣稱其夙敏始王潞歷幽州都督雍州牧徙王沛累進揚州大都
督右衛大將軍更名德徙王雍仍領雍州牧涼州大都督實封千
戶上元元年復名賢是時皇太子薨其六月立賢爲皇太子俄詔監
國賢於處決尤明審朝廷稱焉帝手敕褒賜賢又詔集諸儒左庶

子張大安洗馬劉訥言洛州司戶參軍事格希玄學士許叔牙成
玄一史藏諸周寶寧等共注范曄後漢書書奏帝優賜段物數萬
時正諫大夫明崇儼以左道爲武后所信崇儼言英王類太宗而
相王貴賢聞惡之宮人或傳賢乃后姊韓國夫人所生賢益疑而
后撰少陽政範孝子傳賜賢數以書讓勸愈不安調露中天子在
東都崇儼爲盜所殺后疑出賢謀遣人發太子陰事詔薛元超裴
炎高智周雜治之獲甲數百首於東宮帝素愛賢薄其罪后曰賢
懷逆大義滅親不可赦乃廢爲庶人焚甲天津橋貶大安普州刺
史流訥言於振州坐徙者十餘人開耀元年徙賢巴州武后得政
詔左金吾將軍丘神勣檢衛賢第迫令自殺年三十四后舉哀顯
福門貶勣疊州刺史追復舊王神龍初贈司徒遣使迎喪陪葬乾
陵睿宗立追贈皇太子及謚三子光順守禮守義光順爲樂安王

徙義豐被誅守義爲犍爲王徙封桂陽薨先天中追封光順莒王
守義畢王

守禮嗣王始名光仁授太子洗馬武后革命畏疾宗室而守禮以
父得罪與睿宗諸子閉處宮中十餘年睿宗封相王許出外邸於
是守禮等始居外改司議郎中宗卽位復故封拜光祿卿實封戶
五百唐隆元年進封邠王睿宗立兼檢校左金吾衛大將軍出爲
幽州刺史遙兼單于大都護遷司空開元初累爲州刺史時寧申
歧薛王同爲刺史皆擇僚首持綱紀守禮惟弋獵酣樂不領事故
源乾曜袁嘉祚潘好禮皆爲邠府長史州佐督檢之後還諸王京
師守禮以外支爲王不甚才而多寵嬖子六十餘人無可稱者常
負息錢數百萬或勸少治居產守禮曰豈天子兄無葬者邪諸王
每白上以爲歡歧王嘗奏守禮知雨暘帝問故答曰臣無它當天

后時太子被罪臣幽宮中歲被杖凡四三累創痕膚前兩則沈
懣霽則佳以此知之因泣下帝爲惻然薨年七十贈太尉子承宏
承寧承宏可記者承宏爵廣武王坐交非其人貶房州別駕還爲
宗正卿廣德元年吐蕃入京師天子如陝虜宰相馬重英立承宏
爲帝以翰林學士于可封霍瓌爲宰相賊退詔放承宏于華州死
承寧封嗣邠王承宏燉煌王拜宗正卿與僕固懷忍使回紇和親
卽納其女爲妃封毗伽公主薨贈司空唐制嗣郡王加四品階親
三子服緋開元中張九齡奏寧粹及邠王三子爲王者賜紫餘皆
服緋官不越六局郎王府掾屬仍員外置後從帝至蜀者皆服紫
中宗四子韋庶人生重潤後宮生重福重俊殤帝

懿德太子重潤本名重照避武后諱改焉帝爲皇太子時生東宮
高宗喜甚乳月滿爲大赦天下改元永淳是歲立爲皇太孫開府

置官屬帝問吏部侍郎裴敬彝郎中王方慶對曰禮有嫡子無嫡
孫漢魏太子在子但封王晉立愍懷子爲皇太孫齊立文惠子爲
皇太孫皆居東宮今有太子又立太孫於古無有帝曰自我作故
若何對曰禮君子抱孫不抱子孫可以爲王父尸者昭穆同也陛
下肇建皇孫本支千億之慶帝悅詔議官屬敬彝等奏置師傅友
文學祭酒左右長史東西曹掾主簿管記司錄六曹等官加王府
一級然卒不補將封嵩山召太子赴東都以太孫畱守京師中宗
失位太孫府廢貶庶人別囚之帝復位封邵王大足中張易之兄
弟得幸武后或譖重潤與其女弟永泰郡主及主婿竊議后怒杖
殺之年十九重潤秀容儀以孝愛稱誅不緣罪人皆流涕神龍初
追贈皇太子及諡陪葬乾陵號墓爲陵贈主爲公主
譙王重福高宗時王唐昌郡徙封平恩長安末乃進王神龍初韋

庶人譖與張易之兄弟陷重潤貶濮州員外刺史徙合均二州不
領事景龍三年中宗親郊赦天下十惡者咸宥流人得還重福不
得歸自陳蒼生皆自新而一子擯棄皇天平分固若此乎不報韋
后得政詔左屯衛大將軍趙承恩辭思簡以兵護守睿宗立徙集
州未行洛陽男子張靈均說重福曰大王居嫡長當爲天子相王
雖平大難安可越居大位昔漢誅諸呂乃東迎代王今百官士庶
皆願王來王若陰幸東都殺畱守擁兵西據陝徇河南河北天下
可圖也重福又遣靈均與其黨鄭愔討愔亦密招重福爲天子豫
尊睿宗爲皇季叔重茂皇太弟制稱中元克復元年愔自署左丞
相知內外文武事以靈均爲右丞相天柱大將軍知出征事其餘
以次除署重福自均州與靈均乘驛趨東都舍駙馬裴吳家洛陽
令候吳重福驚遽出欲劫左右屯營兵至天津橋願從者數百人
侍御史李邕遇之先馳至右屯營呼曰譙王得罪先帝擅入都爲
亂公等勉立功取富貴稍稍閉皇城諸門以拒重福徇右營不能
動趨左掖門已闔怒縱火燒之左營兵寢逼衆遂潰重福走山谷
明日畱守裴談總兵大索投漕渠死年三十一磔其屍帝詔以三

品禮葬

節愍太子重俊聖曆三年王義興神龍初王衛拜洛州牧實封千
戶俄領揚州大都督明年爲皇太子以太后喪殺册禮詔在藩食
封歲納東宮給事中盧粲上言太子與列國同入封不可爲法詔
罷之重俊性明果然少法度旣楊璩武崇訓爲賓客二人馮貴寵
無學術惟狗馬蹴踘相戲昵左庶子姚珽數上疏諍導右庶子平
貞慎又獻孝經議養德等傳太子納而不克用武三思挾韋后勢
將圖逆內忌太子而崇訓又三思子尚安樂公主常教主辱重俊

以非韋出詈爲奴數請廢自爲皇太女三年七月重俊恚忿遂率李多祚泊左羽林將軍李思冲李承況獨孤禕之沙叱忠義矯發左羽林及千騎兵殺三思崇訓并其黨十餘人使左金吾大將軍成王千里守宮城自率兵趨蕭章門斬關入索韋后安樂公主昭容上官所在后挾帝升玄武門宰相楊再思蘇瓌李嶠及宗楚客紀處訥統兵二千餘人守太極殿帝召右羽林將軍劉仁景等率留軍飛騎百人拒之多祚兵不得進帝據檻語千騎曰爾乃我爪牙何忽爲亂能斬賊者有賞於是士倒戈斬多祚餘黨潰重俊入終南山欲奔突厥楚客遣果毅趙思慎追之重俊憩于野爲左右所殺詔殊首朝堂獻太廟并以告三思從訓樞睿宗立加贈諡陪葬定陵初重俊被害官屬莫敢視惟永和丞甯嘉勗號哭解衣裹其首時人義之楚客怒收付獄貶平興丞卒至是亦贈永和令

重俊子宗暉景雲三年封湖陽郡王天寶中至太常自外卿薨

睿宗六子肅明皇后生憲宮人柳生攜昭成皇后生玄宗皇帝崔孺人生範王德妃生業後宮生隆悌

讓皇帝憲始王永平文明元年武后以睿宗爲皇帝故憲立爲皇太子睿宗降爲皇嗣更冊爲皇孫與諸王皆出閣開府置官屬長壽二年降王壽春與衡陽巴陵彭城三王同封復詔入閣中宗立改王蔡固辭不敢當唐隆元年進封宋睿宗將建東宮以憲嫡長又嘗爲太子而楚王有大功故久不定憲辭曰儲副天下公器時平則先嫡國難則先功重社稷也使付授非宜海內失望臣以死請因涕泣固讓時大臣亦言楚王有定社稷功且聖庶抗嫡不宜更議帝嘉憲讓遂許之立楚王爲皇太子以憲爲雍州牧揚州大都督太子太師實封至二千戶賜甲第物段五千良馬二十奴婢

十房上田三十頃進尚書左僕射又兼司徒讓司徒更爲太子賓
客時太平公主有醜圖姚元崇宋璟白帝請出憲及申王成義爲
刺史以銷釋陰計乃以司徒兼蒲州刺史進司空玄宗既討定蕭
岑之難進憲位太尉增千戶固辭更授開府儀同三司解太尉揚
州大都督徙王寧又兼太常卿開元十四年表解久之復爲大尉
歷澤歧涇三州刺史累封至五千五百戶二十九年薨初帝五子
列第東都積善坊號五王子宅及賜第上都慶隆坊亦號五王宅
玄宗爲太子嘗製大衾長枕將與諸王共之睿宗知喜甚及光天
後盡以隆慶舊邸爲興慶宮而賜憲及薛王第於勝業坊申歧二
王居安興坊環列宮側天子於宮西南置樓其西署曰花萼相輝
之樓南曰勤政務本之樓帝時時登之間諸王作樂必亟召升樓
與同榻坐或就幸第賦詩燕嬉賜金帛侑歡諸王日朝側門既歸

明板
解下
州字
明板
隆慶

卽具樂縱飲擊毬鬪雞馳鷹犬爲樂如是歲月不絕所至輒中使
勞賜相踵世謂天子友悌古無有者帝於敦睦益天性然雖讒邪
亂其間而卒無以搖時有鶴鴿千數集麟德殿廷樹翔棲浹日左
清道率府長史魏光乘作頌以爲天子友悌之祥帝喜亦爲作頌
憲尤謹畏未嘗干政而與人交帝益信重嘗以書賜憲等曰魏文
帝詩西山一何高高硤硤無極上有兩仙童不飲亦不食賜我一丸
藥光耀有五色服之四五日身體生羽翼朕每言服藥而求羽翼
寧如兄弟天生之羽翼乎陳思王之才足以經國絕其朝謁卒使
憂死魏祚未終司馬氏奪之豈神丸効耶虞舜至聖捨象傲以親
九族九族旣睦平章百姓今數千載天下歸善焉此朕廢寢忘食
所慕歎也頃因餘暇選仙錄得神方云餌之必壽今持此藥願與
兄弟共之偕至長齡永永無極也後申王等相繼薨唯憲在帝親

待愈益厚每生日必幸其第爲壽往往畱宿居常無日不賜遺尚
食總監及四方所獻酒酪異饌皆分餉之憲嘗請歲盡錄賜目付
史官必數百紙後有疾護醫將膳騎相望也僧崇一者療之少損
帝喜甚賜緋袍銀魚已而疾寢劇薨年六十三帝失聲號慟左右
皆泣下帝以憲實推天下有高世之行非大號不稱乃追諡讓皇
帝遣尚書左丞相裴耀卿太常卿韋紹持節奉冊其子璉表陳憲
宿素退讓不敢當大號制不許及斂出天子服一稱詔右監門大
將軍高力士以手書寘靈坐贈妃元爲恭皇后葬橋陵旁及葬敕
中使諭璉等送終之具使衆見之示以儉薄所司請如諸陵設干
味食內壙中監護使耀卿建言尚食料水陸千餘種及馬牛驢犢
麀鹿鷺鴨魚雁體節之味并藥酒三十名盛夏胎養不可多殺考
求禮據無所憑依陛下每申讓帝之志務存約素請蠲省折衷詔

可旣發引大雨有詔慶王潭等涉塗泥步送十里號其墓曰惠陵
憲常從帝按舞萬歲樓帝從複道上見衛士已食棄其餘寶中帝
怒詔高力士杖殺之憲從容曰從複道上窺人之私恐士不自安
且失大體豈以性命輕於餘殮乎帝遽止謂力士曰王於我可謂
有急難也不然且誤殺士又涼州獻新曲帝御便坐召諸王觀之
憲曰曲雖佳然宮離而不屬商亂而暴君卑逼下臣僭犯上發於
忽微形於音聲播之詠歌見於人事臣恐一日有播遷之禍帝默
然及安史亂世乃思憲審音云憲本名成器避昭成太后諡與申
王成義俱改今名憲子十九人其聞者璉嗣莊琳璠

璉眉宇秀整性謹絜善射帝愛之封汝陽王歷太僕卿與賀知章
褚庭誨梁涉等善薨贈太子太師嗣莊幼有令名爲太子左諭德
封濟陰王薨贈幽州大都督琳以祕書監爲嗣寧王從天子幸蜀

薨瑀早有材望偉儀觀始封隴西郡公從帝幸蜀至河池封漢中王山南西道防禦使乾元初寧國公主降回紇詔瑀以特進太常卿持節冊拜回紇爲威遠可汗瑀亦知音嘗早朝過永興里聞笛音顧左右曰是太常工乎曰然它日識之曰何故卧吹笛工驚謝又聞康崑崙奏琵琶曰琵琶聲多琵琶聲少是未可彈五十四絲大絃也樂家以自下逆鼓曰琵琶自上順鼓曰琵琶云肅宗詔收羣臣馬助戰瑀與魏少游等持不可帝怒貶蓬州長史薨贈太子太師諡曰宣孫景儉

景儉字寬中及進士第彊記多聞善言古成敗王霸大略高自負於士大夫無所屈王叔文等更譽之以爲管仲諸葛亮比叔文敗景儉以母喪得不坐韋夏卿守東都辟幕府竇羣任中丞引爲監察御史羣貶景儉亦爲江陵戶曹參軍累擢忠州刺史元和末入

朝不見用復爲澧州刺史素與元稹李紳善一人方在翰林言其才及延英奉辭景儉自陳見抑遠穆宗憐之追詔爲倉部員外郎不遣閱月拜諫議大夫性矜誕使酒縱氣語侵宰相蕭俛段文昌訴于帝貶建州刺史稹得君爲之助故還爲諫議大夫與馮宿楊嗣復溫造李肇等集史官獨孤朗所景儉醉至中書慢罵宰相王播崔植杜元穎更爲遜言厚謝乃去坐貶漳州刺史宿等皆逐矣未及漳稹輔政改楚州刺史議者謂景儉辱丞相貶未至卽遷非是稹懼改少府少監悉還宿等景儉旣湮阨不得志卒然其爲人輕財篤于義旣没士悵悼之

惠莊太子撫本名成義初生武后以母賤欲不齒以示浮屠萬回回詭曰此西土樹神宜兄弟后喜乃畜之垂拱三年始王恒與衛趙二王同封俄改王衡陽睿宗立進王申與歧僻二王同封累遷

右衛金吾二大將軍實封至千戶進司徒兼益州大都督四爲州
刺史開元八年停刺史復爲司徒薨冊書贈太子及諡陪葬橋陵
馮性寬裕儀貌瓌重無嗣詔以讓帝子珣嗣爲懷寧王徙封同安
薨天寶中復以讓帝子璿嗣

惠文太子範始名隆範玄宗立與薛王隆業避帝諱去二名初王
鄭改封衛俄降封巴陵進王岐爲太常卿并州大都督左羽林大
將軍從玄宗誅太平公主以功賜封與薛王業並滿五千戶歷爲
州刺史遷太子太傅開元十四年薨冊書贈太子及諡陪葬橋陵
帝哭之慟徹常膳至累旬羣臣勉請乃復範好學工書愛儒士無
貴賤爲盡禮與閻朝隱劉延琦張諤鄭絳等善常飲酒賦詩相娛
樂又聚書畫皆世所珍者初隋亾禁內圖書湮放唐興募訪稍稍
復出藏祕府長安初張易之奏天下善工潢治乃密使摹肖殆不

可辨竊其真藏于家旣誅悉爲辭稷取去稷又敗範得之後卒爲
火所焚駙馬都尉裴虛已善識緯坐私與範游徙嶺南廷琦貶雅
州司戶諤爲山荏丞然帝於範無少間也謂左右曰兄弟情天至
於我豈有異哉趨競者彊相附我終不以爲纖介時王毛仲等起
賤微暴貴諸王見必加禮獨範接之自如子瑾嗣瑾落魄不飭名
檢沈酒色歷太僕卿封河東王暴薨贈太子少師天寶中復以薛
王子略陽公珍爲嗣歧王珍儀觀豐偉爲宗正員外卿與蔚州鎮
將朱融善融嘗言珍似上皇因有陰謀往語金吾將軍邢濟曰關
外寇近京師草草奈何濟曰我金吾天子押衙以死生從安自脫
融曰見嗣歧王無慮矣濟以聞肅宗詔廢珍爲庶人賜死融黨皆
誅擢濟爲桂管防禦使

惠宣太子業始王趙降封中山授都水使者徙彭城兼陳州別駕

進王辟爲羽林大將軍荊州大都督以好學授祕書監開元初進太子少保卽拜太保累歷州刺史初母早終從母賢妃鞠之八年迎賢妃外邸事之甚謹其女弟淮楊涼國二公主亦早卒撫甥與已子均帝益愛之嘗被疾帝自祝禱旣瘳幸其第置酒賦詩爲初生歡帝嘗不豫業妃弟內直郎韋賓與殿中監皇甫恂妄言休咎事實坐死恂貶錦州刺史妃恐降服待罪業亦不敢入謁帝聞遽召之業伏殿下請罪帝趨就執其手曰吾所猜于兄弟者天地共咎之遂復燕歡仍諭妃復位俄進司徒二十二年業有疾帝憂之一昔容髮爲變因假寢夢獲方寤而業少間邠王守禮等請以事付史官及薨帝悲不能食册書加贈及謚陪葬橋陵十一子其聞者瓊瑒瑋帝後追思業引見瑗等傷之乃下詔共賜實封千戶瑗爲樂安王瑒滎陽王宗正卿瑋爲嗣辟王歷鴻臚卿天寶中瑋舅

韋堅爲李林甫所構坐貶夷陵別駕徙置夜郎南浦及安祿山亂乃還京師

曾孫知柔嗣王再爲宗正卿久之擢京兆尹始鄭白渠梗壅民不得歲知柔調三輔治復舊道灌浸如約遂無旱虞民詣闕請立石紀功知柔固讓得止加累檢校司徒同中書門下平章事又詔營緝太廟判度支充諸道鹽鐵轉運使昭宗出莎城獨知柔從乘輿器用庖頓皆主之大細畢給性儉約雖位通顯無居第未幾出拜清海軍節度使在鎮廉潔貢獻時入進檢校太傅兼侍中仕凡四紀常爲宗室冠卒于鎮

隋王隆悌始封汝南王早薨睿宗追王贈荊州大都督爵不傳贊田中宗失道身爲母所廢妻所弑而四子皆不得其死嗣亦不傳殆天穢其德而絕之何耶彼固自絕于天云爾睿宗有聖子一

受命一追帝三贈太子天與之報福流無窮盛歎

三宗諸子列傳第六 終

唐書卷八十一

唐書八十一

十一宗諸子列傳第七

唐書卷八十二

唐書八十二

玄宗三十子劉華妃生琮第六子琬第十二子璿趙麗妃生瑛元
獻皇后生肅宗皇帝錢妃生琰皇甫德儀生瑤劉才人生琚武惠
妃生一第十五子敏第十八子瑁第二十一子琦高婕妤生敷郭
順儀生璘柳婕妤生玢鍾美人生環盧美人生瑱閻才人生玼王
美人生珪陳才人生琪鄭才人生璵武賢儀生璿第三十子徹餘
七子天母氏失傳

亦諱

奉天皇帝琮景雲元年王許昌郡與真定王同封先天元年進王
郟與郢王同封開元四年領安西大都護安撫河東關內隴右諸
蕃大使十三年從王慶與忠棣榮光儀 禋永壽延盛濟十一王同
封十五年與十王並領節度不出閣琮以涼州都督兼河西諸軍
節度大使天寶元年改節河東十載薨贈太子諡靖德肅宗立詔

曰靖德太子琮親則朕兄睿慈聰明朕昔踐儲極顧誠非次君父有命不敢違永言懇讓不克如素宜進謚奉天皇帝妃竇為恭應皇后詔尚書右僕射裴冕持節改葬羣臣素服臨送達禮門帝御門哭以過喪墓號齊陵無子以太子瑛子俀嗣王琮始名嗣直太子嗣謙棣王嗣真鄂王嗣初靖恭太子嗣玄開元十三年更名曰潭曰鴻曰洽曰洎曰滉後十年改今名

太子瑛始王真定進王郢開元三年立為皇太子七年詔太子諸王入國學行齒胄禮太常擇日謁孔子太子獻詔右散騎常侍褚无量執經羣臣學官諸生以差賜帛明年瑛加元服見太廟十六年詔九品官息女可配太子者有司採閱待進止以太常少卿薛綰女為妃帝種麥苑中瑛諸王侍登帝曰是將薦宗廟故親之亦欲若等知稼穡之難因分賜侍臣曰春秋書無麥禾古所甚重比

詔使者問田畝所對不以實故朕自時以觀其成云初瑛母以僖進善歌舞帝在潞得幸及即位擢妃父元禮兒常奴皆至大官鄂光二王母亦帝為臨淄王時以色選及武惠妃寵幸傾後宮生壽王愛與諸子絕等而太子二王以母失職頗怏怏惠妃女咸宜公主壻揚泗揣妃旨伺太子短譁為醜語惠妃訴于帝且泣帝大怒召宰相議廢之中書令張九齡諫曰太子諸王日受聖訓天下共慶陛下享國久子孫蕃衍奈何一日棄三子昔晉獻公惑嬖姬之讒申生憂死國乃大亂漢武帝信江充巫蠱禍及太子京師喋血晉惠帝有賢子賈后譖之乃至喪凶隋文帝聽后言廢太子勇遂失天下今太子無過二王賢父子之道天性也雖有失尚當掩之惟陛下裁赦帝默然太子得不廢俄而九齡罷李林甫專國數稱壽王美以摠妃意妃果德之二十五年泗復構瑛瑤瑤與妃之兄

薛鏞異謀惠妃使人詭召太子二王曰宮中有賊請介以入太子從之妃白帝曰太子二王謀反甲而來帝使中人視之如言遽召宰相林甫議答曰陛下家事非臣所宜豫帝意決乃詔太子瑛鄂王瑤光王琚同惡均罪竝廢爲庶人鏞賜死瑛瑤琚尋遇害天下冤之號三庶人歲中惠妃數見庶人爲祟因大病夜召巫祈之請改葬且射行刑者瘞之訖不解妃死崇亡寶應元年詔贈瑛皇太子瑤等復王瑛子五人儼伸倩俱備瑛之廢帝使慶王畜儼等爲子儼封新平郡王伸平原郡王倩嗣慶王備太僕卿倩失傳

棣王琰開元二年始王鄴與鄂鄆二王同封後徙王棣領太原牧太原以北諸軍節度大使天寶初爲武威郡都督經略節度河西隴右會妃韋以過置別室而二孺人爭寵不平求巫者密置符琰履中以求媚仇人告琰厭魅上帝伺其朝使人取履視之信帝怒

責琰琰頓首謝曰臣罪宜死然臣與婦不相見二年有二孺人爭長臣恐此三人爲之及推果驗然帝猶疑琰怒未置太子以下皆爲請乃囚於鷹狗坊以憂薨妃緇之女無子還本宗琰凡五十五子得王者四人僕王汝南郡僑宜都俊濟南安順化僚太僕卿俠國子祭酒仁殿中監儉祕書監寶應元年詔復琰王爵

鄂王瑤旣封遙領幽州都督河北節度大使開元二十三年與榮光儀穎永壽延盛濟信義十一王竝授開府儀同三司實封二千戶詔詣東宮尚書省上日百官集送有司供張設樂是日悉拜王府官屬然未有府也而選任冒濫時不以爲榮

靖恭太子琬始王鄆徙王榮爲京兆牧領隴右節度大使又詔親巡按隴右選關內河東飛騎五萬防盛秋累兼單于安北大都護安祿山反詔琬爲征討元帥募河隴兵屯陝以高仙芝副之會薨

琬風格秀整有素望中外倚之及薨莫不爲國悵恨詔加贈諡琬男女五十八人得王者三人俯王濟陰郡偕北平侍陳畱僚衛尉卿儂祕書監佩鴻臚卿

光王瑒開元十三年始王與儀穎永壽延盛濟七王同封俄領廣州都督勇力善騎射帝愛之與鄂王同居友睦甚皆篤學旣廢無嗣初瑒名浚儀王濰穎王湊永王澤壽王清延王洄盛王沐濟王溢信王沔義王濯陳王泚豐王渚恒王漙涼王濞汴王滔至二十三年詔悉改今名

夏悼王一生韶秀以母寵故鍾愛命之曰一未免懷薨追爵及諡時帝在東都故葬龍門東岑欲宮中望見云

儀王璲旣封授河南牧薨贈太傅子侁王鍾陵郡鍾廣陵

穎王璵喜讀書好文辭開元十五年遙領安東都護安祿山反詔

領劔南節度大使以楊國忠爲之副帝西出令御史大夫魏方進爲置頓使移書劔南屬郡託璵之藩大設儲侍璵先卽鎮更以蜀郡長史崔園爲副璵濟江舟中以綵席藉步命徹之曰此可寢奈何踐之璵之出遽不及受節司馬史賁請建大槩蒙油囊先驅以威道路璵笑曰旣爲眞王矣安用假節爲將至成都崔園迎拜馬前璵不爲禮園銜之璵視事再踰月人便其寬園奏罷居內宅乃詔宣慰肅宗於彭原從還京師建中四年薨年六十六子伸爲榮陽王偏高世王側楚國公傳夔國公

懷思王敏貌豐秀若圖畫帝愛之甫晬薨追爵及諡耐葬敬陵永王璘少失母肅宗自養視之長聰敏好學貌陋甚不能正視旣封領荊州大都督安祿山反帝至扶風詔璘卽日赴鎮俄又領山南江西嶺南黔中四道節度使以少府監竇昭爲副璘至江陵募

士得數萬補署郎官御史時江淮租賦鉅億萬在所山委璘生宮中於事不通曉見富且強遂有闕江左意以辭鏐李臺卿韋子春劉巨鱗蔡駟爲謀主肅宗聞之詔璘還觀上皇于蜀璘不從其子襄成王傷剛鷺之謀亦樂亂勸璘取金陵卽引舟師東下甲士五千趨廣陵以渾惟明季廣琛高仙琦爲將然未敢顯言取江左也會吳郡採訪使李希言平牒璘璘因發怒曰寡人上皇子皇帝弟地尊禮絕今希言乃平牒抗威落筆署字何邪乃使惟明襲希言而令廣琛趨廣陵攻採訪使李成式璘至當塗希言已屯丹楊遣將元景曜等拒戰不勝降於璘江淮震動明年肅宗遣宦者啖廷瑤等與成式謀招諭之時河南招討判官李銑在廣陵有兵千餘廷瑤邀銑屯楊子成式又遣裴戎以廣陵卒三千戍伊婁埭張旗幟大閱士璘與傷登陣望之有懼色廣琛知事不集謂諸將曰與公等從王豈欲反邪上皇播遷道路不通而諸子無賢於王者如總江淮銳兵長驅雍洛大功可成今乃不然使吾等名絳叛逆如後世何衆許諾遂割臂盟於是惟明奔江寧馮季康奔白沙廣琛以兵六千奔廣陵璘使騎追躡之廣琛曰我德王故不忍決戰逃命歸國耳若逼我且決死追者止乃免是夜銑陣江北夜然束葦人執二炬景亂水中覘者以倍告璘軍亦舉火應之璘疑王師已濟攜兒女及麾下遁去遲明覺其紿復入城具舟楫使傷驅衆趨晉陵謀者告曰王走矣成式以兵進先鋒至新豐璘使傷仙琦逆擊之銑合勢張左右翼射傷中肩軍遂敗仙琦與璘奔鄱陽司馬閉城拒璘怒焚城門入之收庫兵掠餘干將南走嶺外皇甫侁兵追及之戰大庾嶺璘中矢被執侁殺之傷爲亂兵所害仙琦逃去璘未敗時上皇下詔降爲庶人徙置房陵及死侁送妻子至蜀上

皇傷悼久之肅宗以少所自鞠不宣其罪謂左右曰皇甫侁執吾弟不送之蜀而擅殺之何邪由是不復用薛鏐等皆伏誅子儼爲餘姚王偵莒國公儼邠國公伶儀竝國子祭酒

壽王瑁母惠妃頻姪不育及瑁生寧王請養邸中元妃自乳之名爲已子故封比諸王最後開元十五年遙領益州大都督初帝以永王等尚幼詔不入謁瑁七歲請與諸兄衆謝拜舞有儀矩帝異之寧王薨請制服以報私恩詔可大曆十年薨贈太傅子王者三人儁王德陽郡休濟陽郡俱廣陽郡伉僻國公傑國子祭酒

延王玢母尚書左丞範之孫帝重其名家而玢亦仁愛有學旣封遙嶺安西大都護帝入蜀玢凡三十六子不忍棄故徐進數日見行在所帝怒漢中王瑀申救得解聽歸靈武興元元年薨子倬王彭城郡僖平陽侯魯國公偃荆國公仇太僕卿

盛宣王琦旣封領揚州大都督帝之西詔爲廣陵大都督淮南江東河南節度大使以劉彙爲副李成式爲副大使琦不行廣德二年薨贈太傅子儼封眞定王佩武郡王俗徐國公係許國公濟王環逸其薨年子儵王永嘉郡僖平樂郡

信王璠開元二十一年始王與義陳豐恒涼汴六王同封子修封新安王侗晉陵王

義王玘與信王竝失薨年子儀爲舞陽王僂高密王

陳王珪二十一子得王者三人倫王安南郡佗臨淮佞安陽

豐王璠已封爲左衛大將軍帝至普安授珪武威都督河西隴右

安西北庭節度大使以隴西太守鄧景山爲副珪不行廣德初吐

蕃入京師代宗幸陝將軍王懷忠閉苑門以五百騎劫諸王西迎

虜遇郭子儀懷忠曰上東遷宗社無主今僕奉諸王西奔以係天

下望公爲元帥惟所廢置子儀未對瑛曰公何如司馬王延昌質責瑛曰上雖蒙塵未有失德王爲藩翰安得狂悖之言子儀亦讓之卽護送行在所帝赦不責瑛語不遜羣臣恐其亂請除之乃賜死子佻爲齊安王

恒王瑱好方士常服道士服從帝幸蜀還代宗時薨

涼王璿母高平王重規之女宮中號小武妃者璿薨代宗時子佻爲瀘陽郡王

汴哀王璿於諸子爲最少初封纔數歲容貌秀澈有成人風帝愛之開元二十三年授右千牛衛大將軍明年薨唐制親王封戶八百增至千公主三百長公主止六百高宗時沛英豫三王太平公主武后所生戶始踰制垂拱中太平至千二百戶聖曆初相王太平皆三千壽春等五王各三百神龍初相王太平至五千衛王三

千溫王二千壽春等王皆七百嗣雍衡陽臨淄巴陵中山王五百安樂公主二千長寧千五百宣城宜城宣安各千相王女爲縣主各三百相王增至七千安樂三千長寧二千五百宣城以下二千相王太平長寧安樂以七丁爲限雖水旱不蠲以國租庸滿之中宗遺詔雍壽春王進爲親王戶千開元後天子敦睦兄弟故寧王戶至五千五百岐薛五千申王以外家微戶四千邠王千八百帝妹戶千中宗諸女如之通以三丁爲限及皇子封王戶二千公主五百咸宜公主以母惠妃故封至千自是諸公主例千戶止初文德皇后崩晉王最幼太宗憐之不使出閤豫王亦以武后少子不出閤嗣聖初卽帝位及降封相王乃出閤中宗時譙王失愛遷外藩溫王年十七猶居宮中遂立爲帝開元後皇子幼多居禁內旣長詔附苑城爲太宮分院而處號十王宅所謂慶忠棣鄂榮光儀

穎永延盛濟等王以十舉全數也中人押之就夾城參天子起居家今日進膳引詞學士入授書謂之侍讀壽信義陳豐恒涼七王就封亦居十宅鄂光廢死忠王立爲太子慶棣繼薨唯榮儀十四王居院而府幕列於外坊歲時通名起居旣又諸孫多則於宅外更置百孫院天子歲幸華清宮又置十王百孫院于宮側官人每院四百餘百孫院亦三四十人禁中置維城庫以給諸王月奉諸孫納妃嫁女就十王宅太子不居東宮處乘輿所幸別院太子親王公主婚嫁並供帳於崇仁之禮院此承平制云

肅宗十四子章敬皇后生代宗皇帝宮人孫生係張生倓王生秘陳婕妤生僅章妃生憫張美人生倓後宮生榮裴昭儀生儂段婕妤生倓崔妃生憫張皇后生召侗後宮生倓

越王係生開元時玄宗末年悉王太子子成係王南陽郡帝卽位

至德二載十一月進王趙與彭充涇鄆襄和召興定九王同封乾元二年九節度兵潰河北朝廷震駭乃以本光弼代郭子儀總兵關東而光弼請賢王爲帥於是詔係充天下兵馬元帥而光弼以司空兼侍中薊國公副知節度行營事係留京師史思明陷洛陽係請行不聽明年徙王越帝寢疾皇太子監國張皇后與中人李輔國有隙因召太子入謂曰輔國典禁軍用事久四方詔令皆出其口矯天子制逼徙聖皇天下側目今上疾彌留輔國常怏怏忌吾與汝又程元振陰結黃門圖不軌若釋不誅禍不移頃太子泣曰此二人者陛下勲舊而上體不裕重以此事得無震驚乎願出外徐計之后曰是難與共事者乃召係曰汝能行此乎係許諾卽遣內謁者監段恒俊選材勇官者二百人授甲長生殿以帝命召太子元振以告輔國乃相與勒兵凌霄門迎太子以難告太子曰

上疾亟吾可懼死不赴乎元振曰赴則及禍乃以兵護太子止飛龍殿勒兵夜入三殿收係及恒俊等百餘人繫之幽后別殿后及係皆爲輔國所害係三子建王武威郡道興道逾齊國公

承天皇帝俊始王建寧英毅有才略善騎射祿山亂典親兵扈車駕度渭百姓遮道留太子太子使喻曰至尊播遷吾可以違左右乎俊進說曰逆胡亂常四海崩分不因人情圖興復雖欲從上入蜀而散關以東非國家有夫大孝莫若安社稷殿下當募豪傑趣河西收牧馬今防邊屯士不下十萬而光弼子儀全軍在河朔與謀興復策之上者廣平王亦贊之於是議定太子北過渭兵仗監惡士氣崩沮日數十戰俊以驍騎數百從每接戰常身先血殷袂不告也太子或過時未食俊輒涕泗不自勝三軍皆屬目至靈武太子卽帝位議以俊爲天下兵馬元帥左右固請廣平王帝曰廣

平旣冢嗣安用元帥答曰太子從曰撫軍守曰監國元帥撫軍也莫宜於廣平王帝從之更詔俊典親軍以李輔國爲府司馬時張良娣有寵與輔國交構欲以動皇嗣者俊忠蹇數爲帝言之由是爲良娣輔國所譖安曰俊恨不總兵鬱鬱有異志帝惑偏語賜俊死俄悔悟明年廣平王收二京使李泌獻捷泌與帝雅素從容語俊事帝改容曰俊於艱難時實自有力爲細人間閱欲害其兄我計社稷割愛而爲之所泌曰爾時臣在河西知其詳廣平於兄弟篤睦至今言建寧則嗚咽不自已陛下此言得之讒口耳帝泣下曰事已爾未耐何泌曰陛下嘗聞黃臺瓜乎高宗有八子天后所生者四人自爲行而睿宗最幼長曰弘爲太子仁明孝友后方圖臨朝鳩殺之而立次子賢賢日憂惕每侍上不敢有言乃作樂章使工歌之欲以感悟上及后其曰種瓜黃臺下瓜熟子離離一摘

使瓜好再摘今瓜稀三摘尚云可四摘抱蔓歸而賢終爲后所斥死黔中陛下今一摘矣慎無再帝愕然曰公安得是言是時廣平有大功亦爲后所構故泌因對及之廣平遂安及卽位追贈倓齊王大曆三年有詔以倓當艱難時首定大謀排衆議於中興有功乃進諡承天皇帝以興信公主季女張爲恭順皇后冥配焉葬順陵祔主奉天皇帝廟同殿異室云初李泌請加贈倓代宗曰倓性忠孝而困於讒追帝之若何答曰開元中上皇兄弟皆贈太子帝曰是特祖宗友愛耳豈若倓有功乎於是追帝號遣使迎喪彭原旣至城門喪輜不動帝謂泌曰豈有恨邪卿往祭之以白朕意且卿及知倓艱難定策者泌爲挽詞二解追述倓志命挽士唱泌因進辭輜乃行觀者皆爲垂泣

衛王佖始王西平蚤薨寶應元年五月與鄆王同追封

彭王僅始王新城進封彭史思明陷河洛人心震駭羣臣請以諸王臨統方鎮兵遙相維壓於是詔僅充河西節度充王北庭涇王隴右杞王陝西興王鳳翔竝爲大使是歲僅薨子鎮爲常山郡王充王儻始王潁川進王充寶應元年薨

涇王佖始王東陽進王涇興元元年薨

鄆王樂始王靈昌蚤薨追封

襄王儼至德二載始王與杞召興定四王同封貞元七年薨子宣爲伊吾郡王哀樂安王宣裔孫熅

熅性謹柔材無過人者光啓二年田令孜逼僖宗幸興元邠寧節度使朱玫以五千騎追乘輿不及熅以疾不能從玫劫之駐鳳翔得臺省官百餘乃脅宰相蕭遘等率羣臣盟石鼻驛奉熅爲嗣襄王監軍國事因還京師卽封拜官屬初遘執不可於是罷遘而玫

自爲侍中號令已出以裴澈爲門下侍郎鄭昌圖中書侍郎皆平章事遣柳陟等十餘人分諭天下嗣襄王所以監國意皆得進官致又脅太子太師裴瓌等奉成勸進熅五讓乃卽位改元建貞尊僖宗爲太上元皇聖帝河中卽度使王重榮率諸藩貢奉歸者十八九而蔡州秦宗權自僭號惟太原李克用不從時帝遣使喻重榮克用故二人聽命樞密使楊復恭等傳檄三輔募能斬攻者以邠寧節度畀之其僞將王行瑜自鳳州入京師殺攻而熅與澈昌圖并官屬奔東渭橋重榮給使迎之熅與官屬別且泣曰朕見重榮當令備所服迓公等至蒲執殺之因械澈等于獄誅殺僞官函熅首至行在所熅卽僞位凡九月敗始熅首至羣臣白帝御興元南門受之百官稱賀太常博士殷盈孫奏言禮公族有罪有司曰某之罪在大辟君曰赦之如是者三走出致刑焉君爲素服不舉者三日今熅皇族以不能固節迫脅至此宜廢爲庶人絕屬籍葬以庶人禮大捷之慶須朱玫首至乃賀詔可

杞王倓貞元十四年薨

召王偁元和元年薨

恭懿太子伾始封興王上元元年薨伾生后方專愛帝最憐之后數撼儲嫡欲以伾嗣會薨計塞是夕帝及后夢伾辭決流涕去帝鯁悵故册贈皇太子

定王侗寶應初薨

代宗二十子睿眞皇后生德宗皇帝崔妃生邈貞懿皇后生迥十七王史亾其母之氏位

昭靖太子邈好學以賢聞上元二年始王益昌帝卽位寶應元年進王鄭與韓王同封淄青牙將李懷玉逐其帥侯希逸詔邈爲平

盧潘青節度大使以懷玉知畱後大曆初代皇太子爲天下兵馬元帥八年薨遂罷元帥府

均王遐早薨貞元八年追封

睦王述大曆十年田承嗣不臣而昭靖天無疆王帝乃悉王諸子領諸鎮軍威天下於是以述爲睦王領嶺南節度逾郴王渭北鄜坊節度迴韓王汴宋節度造忻王昭義節度皆爲大使連爲恩王遘鄜王暹韶王遇端王適循王通恭王達原王逸雅王竝開府儀同三司然不出閭德宗建中初周天下訪太后所在述於諸王最長故拜奉迎太后使以工部尚書喬琳副之貞元七年薨

丹王逾始王郴建中四年與簡王同徙封元和十五年薨

恩王連元和十二年薨

韓王迥始王延慶郡以母寵故與鄭王先徙封貞元十二年薨

簡王邁始王鄜徙封簡元和四年薨

益王迥大曆十四年始王亾薨年

隋王迅興元元年薨

荆王選蚤薨建中二年追王

蜀王遡本名遂大曆十四年始王建中二年改今名

忻王造元和六年薨

韶王暹貞元十二年薨

嘉王運貞元十七年薨

端王遇貞元七年薨

循王適亾薨年

恭王通亾薨年

原王達太和六年薨

雅王逸貞元十五年薨

德宗十一子昭德皇后生順宗皇帝帝取昭靖太子子誼爲第二子又取順宗子諤爲第六子餘八王史亾其母之氏位

舒王誼初名謨帝愛其幼取爲子大曆十四年始王舒與通虔肅資四王同封拜開府儀同三司詔有司給奉稍俄以軍興罷謨於諸王最長帝欲試以事故拜涇原節度大使時尚父郭子儀病篤帝臨軒遣謨持詔往視謨冠遠游冠御絳袍乘象輅駟馬飛龍士三百國府官皆袴褶以從子儀手叩頭謝恩謨宣詔已乃易服勞問還於是李希烈反招討使李勉戰不勝奔宋州朝廷大震乃拜謨揚州大都督荆襄江西沔鄂節度使諸軍行營兵馬都元帥改名誼軍中以哥舒翰由元帥敗而王所封同之帝乃使徙王普以兵部侍郎蕭復爲統軍長史湖南觀察使孔巢父爲行軍左司馬

山南東道節度行軍司馬樊澤爲右刑部員外郎劉從一侍御史韋儻爲判官兵部員外郎高參掌書記右金吾大將軍渾瑊爲中軍虞候江西節度使嗣曹王臯爲前軍兵馬使鄂岳團練使李兼副之山南東道節度使賈耽爲中軍兵馬使荆南節度使張伯儀爲後軍兵馬使左神武軍使王价左衛將軍高承謙檢校太子詹事郭曙檢校右庶子常愿爲押衙未及行涇原兵士反誼從帝出奉天朱泚攻城誼晝夜傳勞諸軍不解帶帝還京師復故封揚州大都督如故永貞元年薨

通王誾始王拜開府儀同三司貞元九年領宣武節度大使以李萬榮爲畱後二年徙河東以李說爲畱後皆不出閤

虔王諒以王拜開府儀同三司貞元二年領蔡州節度大使以吳少誠爲畱後十年徙節朔方靈鹽以李樂爲畱後明年領橫海又

徙徐州以程懷信張愔為留後不出閣

肅王詳資秀異帝愛之建中二年薨甫四歲帝欲用浮屠說塔而不墳禮儀判官李峇諫非禮乃止詔贈揚州大都督

文敬太子諫見愛於帝命為子貞元初先諸王王邕歷義武昭義二軍節度大使以張茂昭王虔休為留後不出閣十五年薨年十八追贈及謚葬日羣臣以位而哭通化門外陵及廟置令丞云

資王謙亡薨年

代王譚始王縉雲郡蚤薨建中二年追王

昭王誠貞元二十一年始王亡薨年

欽王鄂順宗即位與珍王同封亡薨年

珍王誠大和六年薨

順宗二十七子莊憲皇后生憲宗皇帝及綰張昭訓生經趙昭儀

生結王昭儀生總約緝餘二十王史亡母之氏位四王蚤薨亡官

鄭王經本名渙貞元四年始王建康郡與廣陵洋川臨淮弘農漢

東晉陵高平雲安宣城德陽河東洛交十二王同封二十一年又

與均淑莒密郃邵宋集冀和衡欽會珍福撫岳袁桂翼二十王皆

進王王二十九年大和八年薨

均王緯初名沔王洋川後進王王三十三年開成二年薨

淑王縱初名洵王臨淮後進王王三十二年開成元年薨

莒王紆初名浼為祕書監王弘農後進王王二十九年大和八年

薨

密王綱初名泳王漢東後進王王三年元和二年薨

郃王總初名湜授少府監王晉陵後進王王四年元和三年薨

邵王約初名淑爲國子祭酒王高平進王王二年元和元年薨

宋王結初名滋王雲安進王王十八年長慶二年薨

集王緝初名淮王宣城進王王十八年長慶二年薨

冀王絳初名潁爲太常卿王德陽進王王三十年大和九年薨

和王綺初名浥王河東進王王二十八人大和七年薨

衡王絢王二十二年寶應二年薨

會王纁王六年元和五年薨

福王綰歷魏博節度大使咸通元年進拜司空王五十七年咸通

二年薨

珍王縉初名況王洛交後進王亾薨年

撫王紘咸通初歷司空又進司徒太尉王七十三年乾符二年薨

岳王緄王二十三年大和二年薨

袁王紳王五十六年咸通元年薨

桂王綸王十年元和九年薨

翼王綽王五十八年咸通三年薨

蘄王緝王六年咸通八年薨

欽王績亾薨年

憲宗二十子紀美人生寧懿安皇后生穆宗皇帝孝明皇后生宣宗皇帝餘十七王皆後宮所生也適其母之號氏

惠昭太子寧貞元二十一年始封王與同安彭城高密文安四

王同封帝卽位進王鄧與澧深洋絳四王同封於是國嗣未立李

絳等建言聖人以天下爲大器知一人不可獨化四海不可無本

故建太子以自副然後人心定宗祏安有國不易之常道陛下受

命四年而冢子未建是開窺覲之端乖慎重之義非所以承列聖

示萬世帝曰善以寧爲皇太子更名宙前以制示絳等未幾復初
名冊禮用孟夏雨不克改用孟秋亦雨冬十月克行禮明年薨年
十九

灋王暉始王同安後進王惠昭之喪吐突承瓘議復立儲副意屬
暉帝自以穆宗爲太子帝崩之夕承瓘死王被殺祕不發喪久之
以告廢朝三日三子曰漢王東陽郡曰源安陸曰演臨安初暉名
寬深王察洋王寰絳王察建王審元和七年並改今名

深王崇始王彭城郡進王深子潭王河內淑吳興洋王忻始王高
密進王洋大和二年薨子浦王潁川郡

絳王悟始王文安進王敬宗崩蘇佐明等矯詔以王領軍國事王
守澄等立文宗王見殺二子洙王新安潞高平

建王恪元和元年始封時淄青節度使李師古死其弟師道丐符

節故詔恪爲鄆州大都督平盧軍淄青等州節度大使以師道爲
留後然不出閭長慶元年薨無嗣

鄆王憬長慶元年始王與瓊沔婺茂淄衢澶七王同封開成四年
薨子溥平陽郡王

瓊王悅子津河間郡王

沔王郇子瀛晉陵郡王

婺王惲子清新平郡王

茂王惲子漙武功郡王

淄王協開成元年薨子澣許昌郡王渙馮翊郡王

衡王憺子涉晉平郡王

澶王忱子濬雁門郡王

棣王惲大中六年始王與彭信二王同封咸通三年薨無嗣

彭王惕乾寧中韓建殺之石隄谷無嗣

信王慎咸通八年薨無嗣

榮王慎咸通三年始王廣明初拜司空子令平嗣王凡八王史失其薨年

穆宗五子恭僖皇后生敬宗皇帝貞獻皇后生文宗皇帝宣懿皇后生武宗皇帝餘二王亾其母之氏位

懷懿太子湊少雅裕有尋短長慶元年始王漳與安王同封文宗卽位疾王守澄頗恨引支黨撓國謀盡誅之密引宰相宋申錫使爲討守澄客鄭注伺知之以告乃謀先事殺申錫又以王賢有中
外擊因欲株聯大臣族夷之乃令神策虞候豆盧著上飛變且言
宮史晏敬則朱訓與申錫昵吏王師文圖不軌訓嘗言上多疾太
子幼若兄終弟及必漳王立申錫陰以金幣進王而王亦以珍服

厚答卽捕訓等繫神策獄榜掠定其辭諫官羣伏閣極言出獄牒
付外雜治注等懼事洩乃請下詔貶王帝未之悟因黜湊爲巢縣
公時大和五年也命中人持詔卽賜且慰曰國法當爾無它憂八
年薨贈齊王注後以罪誅帝哀湊被讒死不自明開成三年追贈
安王溶初楊賢妃得寵於文宗晚稍多疾妃陰請以王爲嗣密爲
自安地帝與宰相李珣謀珣謂不可乃止及帝崩仇士良立武宗
欲重已功卽擢溶嘗欲以爲太子事殺之

敬宗五子妃郭氏生普餘四子亾母之氏位

悼懷太子普姿性韶悟寶曆元年始王晉文宗愛之若已子嘗欲
爲嗣大和二年薨帝惻念不能已故贈卹加焉敬宗第二子休復
文宗開成二年封梁王第三子執中爲襄王第四子言揚爲紀王
第五子成美爲陳王執中子寀爲樂平郡王

陳王成美初文帝以莊恪薨大臣數請建東宮開成四年帝乃立成美爲皇太子典冊未具而帝崩仇士良立武宗殺之於邸子儼王宣城郡文宗二子王德妃生永後宮生宗儉

文宗
行

莊恪太子永大和四年始王魯帝以王幼宜得賢輔因召見傅和元亮元亮以卒史進有所問不能答帝責謂宰相王可教官屬應任士大夫賢者寧元亮比邪於是劇選戶部侍郎庾敬休兼王傅太常卿鄭肅兼長史戶部郎中李踐方兼司馬六年遂立爲皇太子帝承寶曆荒怠身勤儉率天下謂晉王生謹敏欲引爲嗣會蚤夭故久不議東宮事及太子立天下屬心焉開成三年詔宮臣詣崇明門謁朔望侍讀偶日入對太子稍事燕豫不能壹循法保傳戒告愬不納又母愛弛楊賢妃方幸數譖之帝它日震怒御延英引見羣臣詔曰太子多過失不可屬天下其議廢之羣臣頓首言太子春秋盛雖有過尚可改且天下本不可輕動惟陛下事赦御史中丞狄兼謩流涕固爭帝未決罷羣臣又連章論救意稍釋詔太子還少陽院以中人護視誅倖昵數十人敕侍讀竇宗直周敬復詣院授經然太子終不能自白其讒而行已亦不加修也是年暴薨帝悔之明年下詔以陳王爲太子置酒殿中有俳兒緣橦父畏其顛環走橦下帝感動謂左右曰朕有天下返不能全一兒乎因泣下卽取坊工劉楚才等數人付京兆榜殺之及禁中女倡十人斃永巷皆短毀太子者宰相楊嗣復等不及知因言楚才等罪當誅京兆殺之不覆奏敢以請翌日詔京兆後有決死敕不覆者亦許如故事以聞

蔣王宗儉開成二年始王亾薨年

武宗五子其母氏位皆不傳

杞王峻開成五年始王
益王峴會昌二年始王與兗德昌三王同封

兗王岐

德王嶧

昌王嵯竝逸其薨年

宣宗十一子元昭太后生懿宗皇帝餘皆亾其母之氏位

靖懷太子漢會昌六年始王雍與夔慶二王同封大中六年薨有

詔追册

雅王溆大中元年始王亾薨年

通王滋會昌六年始王夔與慶王沂同封帝初詔鄆王居十六宅

餘五王處大明宮內院以諫議大夫鄭漳兵部郎中李鄴爲侍讀

五日一謁乾符門爲王授經鄆王立爲懿宗乃罷滋徙王昭宗乾

寧三年領侍衛諸軍是時誅王行瑜而李茂貞怨以兵入覲詔滋

與諸王分統安聖捧宸保寧安化軍衛京師天子將狩太原韓建

道迎之畱次華州建畏王等有兵遣人上急變告諸王欲殺建脅

帝幸河中帝驚召建諭之稱疾不肯入敕滋與睦王濟王韶王彭

王韓王沂王陳王謁建自解建畱軍中奏言中外異體臣不可以

私見又言晉八王擅權卒敗天下請歸十六宅悉罷所領兵帝不

許建以兵環行在請誅大將李筠帝懼斬筠以謝建盡逐衛兵自

是天子孤弱矣初帝使嗣延王戒不嗣丹王允往見李克用二王

還建惡之又嗣覃王嘗督軍伐茂貞於是劾奏比歲兵纏近輔諸

王階其禍使乘輿越在下藩不得安臣已請解其兵今延覃丹三

王尚陰計以危國請誅之帝曰渠至是邪後三日與劉季述矯詔

以兵攻十六宅諸王被髮乘垣走或升屋極號曰帝救我建乃將

十一王并其屬至石隄谷殺之徐以謀反聞天下寃之濟韶彭韓沂陳延覃丹九王史逸其系胄云

慶王泚大中十四年薨

濮王澤大中二年始王亾薨年

鄂王潤大中五年始王乾符三年薨

懷王洽大中八年與昭康二王同封亾薨年

昭王泚乾符三年薨

康王汶乾符四年薨

廣王灊大中十一年始王與衛王同封乾符四年薨

衛王濯大中十四年薨

懿宗八子惠安皇后生僖宗皇帝恭憲皇后生昭宗皇帝餘六王亾其母氏位

魏王侑咸通三年始王與涼蜀二王同封

涼王偲乾符六年薨

蜀王偁

威王偁咸通六年始王郢十年徙王

吉王保咸通十三年始王與睦王同封王於兄弟爲最賢始僖宗

崩王最長將立之楊復恭獨議以昭宗嗣乾寧元年李茂貞等以

兵入京師謀廢帝立王會李克用以兵逐行瑜乃止

恭哀太子倚初封睦王爲劉季述所殺天復初追贈

僖宗二子史失其母氏位

建王震中和元年始王

益王陞光啓三年始王竝亾薨年

昭宗十七子積善皇后生裕及哀皇帝餘皆失母之氏位

德王裕大順二年始王帝幸華州韓建已奪諸王兵不自安乃請王皇子之未王者既又殺諸王因請立裕爲皇太子釋言於四方時乾寧四年也劉季述等幽帝東內奉裕卽皇帝位季述誅裕匿右軍或請殺之帝曰太子冲孺賊疆立之且何罪詔還少陽院復爲王朱全忠自鳳翔還見王春秋盛標宇軒秀忌之密語崔胤曰王旣竊帝矣大義滅親渠可畱公任宰相盍啓之胤從容言如全忠意帝不許他日以語全忠全忠曰此國大事臣安敢與此必胤賣臣也乃免帝遷洛它日謂蔣玄暉曰德王朕愛子全忠奈何欲殺之言已泣下自齧指流血玄暉卽隨語全忠全忠恚帝被弑玄暉置酒邀諸王九曲池飲酣皆殺之投尸水中

棣王禠乾寧元年始王與虔沂遂三王同封

虔王禠

沂王禠

遂王禠

景王禠乾寧四年始王與禠王同封

禠王禠

雅王禠光化元年始王與瓊王同封

瓊王禠

端王禠天祐元年始王與豐和登嘉四王同封

豐王禠

和王禠

登王禠

嘉王禠

順王禠天祐二年始王與蔡王祐同封

蔡王祐

贊曰唐自中葉宗室子孫多在京師幼者或不出閣雖以國王之實與匹夫不異故無赫赫過惡亦不能為王室軒輊運極不還與唐俱殫然則歷數短長自有底止彼漢七國晉八王不得其效愈速禍云

十一宗諸子列傳第七

唐書八十二

唐書八十二

諸公主列傳第八

唐書八十三

唐書八十三

世祖一女

同安公主高祖同母媼也下嫁隋州刺史王裕貞觀時以屬尊進大長公主嘗有疾太宗躬省視賜縑五百姆侍皆有資予永徽初賜實戶三百薨年八十六裕隋司徒東之子終開府儀同三司高祖十九女

長沙公主下嫁馮少師

襄陽公主下嫁竇誕

平陽昭公主太穆皇后所生下嫁柴紹初高祖兵興主居長安紹曰尊公將以兵清京師我欲往恐不能偕奈何主曰公行矣我自為計紹詭道走并州主奔鄠發家貲招南山凶命得數百人以應帝於是名賊何潘仁壁司竹園殺行人稱總管主遣家奴馬三寶

喻降之。共攻鄆別部賊李仲文。向善志立師。利等各持所領會。戲下。因略地。蓋屋武功。始平。下之。乃申法誓衆。築剽奪。遠近咸附。勒兵七萬。威振關中。帝度河。紹以數百騎。竝南山來迎。主引精兵萬人。與秦王會渭北。紹及主對置幕府。分定京師。號娘子軍。帝卽位。以功給資。不涯。武德六年薨。葬加前後部羽葆。鼓吹大路。麾幢。虎賁甲卒。班劍。太常議婦人葬。古無鼓吹。帝不從。曰。鼓吹軍樂也。往者。主身執金鼓。參佐命。于古有邪。宜用之。

高密公主下嫁長孫孝政。又嫁段綸。綸隋兵部尚書。文振子。爲工部尚書。杞國公永徽六年主薨。遺命吾葬必令墓東向。以望獻陵。冀不忘孝也。

長廣公主始封桂陽。下嫁趙慈景。慈景隴西人。帝美其姿。制故妻之。帝起兵。或勸去。對曰。母以我爲命。且安往。吏捕繫于獄。帝平

京師。引拜開化郡公。爲相國府文學。進兵部侍郎。爲華州刺史。討堯君素。戰死。贈秦州刺史。諡曰忠。公主更嫁楊師道。聰悟有思。工爲詩。豪侈。自肆。晚稍折節。以壽薨。

長沙公主始封萬春。下嫁豆盧寬子懷讓。

房陵公主始封永嘉。下嫁竇奉節。又嫁賀蘭僧伽。

九江公主下嫁執失思力。

廬江公主下嫁喬師望。爲同州刺史。

南昌公主下嫁蘇勗。

安平公主下嫁楊思敬。

淮南公主下嫁封道言。

真定公主下嫁崔恭禮。

衡陽公主下嫁阿史那社尒。

丹陽公主下嫁薛萬徹萬徹恚甚公主羞不與同席者數月太宗聞笑焉為置酒悉召它婿與萬徹從容語握柴賭所佩刀陽不勝遂解賜之主喜命同載以歸

臨海公主下嫁裴師律

館陶公主下嫁崔宣慶

安定公主始封千金下嫁溫挺挺死又嫁鄭敬玄

常樂公主下嫁趙瓌生女為周王妃武后殺之逐瓌括州刺史徙壽州越王貞將舉兵遺瓌書假道瓌將應之主進使者曰為我謝王與其進不與其退若諸王皆丈夫不應淹以至是我聞楊氏篡周尉遲迥乃周出猶能連突厥使天下響震况諸王國懿親宗祏所託不捨生取義尚何須邪人臣同國患為忠不同為逆王等勉之王敗周興劾瓌與主運謀皆被殺

太宗二十一女

襄城公主下嫁蕭銑性孝睦動循矩法帝敕諸公主視為師式有司告營別第辭曰婦事舅姑如父母異宮則定省闕止葺故第門列雙戟而已銳卒更嫁姜簡永徽二年薨高宗舉哀於命婦朝堂遣工部侍郎丘行淹馳驛弔祭陪葬昭陵喪次故城帝登樓望哭送柩

汝南公主早薨

南平公主下嫁王敬直以累斥嶺南更嫁劉玄意

遂安公主下嫁竇逵逵死又嫁王大禮

長樂公主下嫁長孫沖帝以長孫皇后所生故敕有司裝資視長公主而倍之魏徵曰昔漢明帝封諸王曰朕子安得同先帝子乎然則長公主者尊公主矣制有等差渠可越也帝以語后后曰嘗

聞陛下厚禮徵而未知也今聞其言乃納主於義社稷臣也妾於陛下夫婦之重有所言猶候顏色況臣下情隔禮殊而敢犯嚴顏陳忠言哉願許之與天下爲公帝大悅因請齎帛四百匹錢四十萬卽徵家賜之

豫章公主下嫁唐義識

北景公主始封巴陵下嫁柴令武坐與房遺愛謀反同主賜死顯慶中追贈立廟於墓四時祭以少牢

普安公主下嫁史仁表

東陽公主下嫁高履行高宗卽位進爲大長公主韋正矩之誅主坐婚家斥徙集州又坐章懷太子累奪邑封以長孫无忌舅族也故武后惡之垂拱中并二子徙置巫州

臨川公主韋貴妃所生下嫁周道務主工籀隸能屬文高宗立上

孝德頌帝下詔褒答永徽初進長公主恩賞卓異永淳初薨道務殿中大監譙郡公範之子初道務孺穉時以功臣子養宮中範卒還第毀瘠如成人復內之年十四乃得出歷營州都督檢校右驍衛將軍諡曰襄

清河公主名敬字德賢下嫁程懷亮薨麟德時陪葬昭陵懷亮知節子也終寧遠將軍

蘭陵公主名淑字麗貞下嫁竇懷悫薨顯慶時懷悫官兗州都督太穆皇后之族子

晉安公主下嫁韋思安又嫁楊仁輅

安康公主下嫁獨孤謀

新興公主下嫁長孫曦

城陽公主下嫁杜荷坐太子承乾事誅又嫁薛瓘初主之婚帝使

卜之繇曰二火皆食始同榮末同戚請晝昏則吉馬周諫曰朝謁以朝思相戒也講習以晝思相成也燕飲以晝思相歡也婚合以夜思相親也故上下有成內外有親動息有時吉凶有儀今先亂其始不可爲也夫卜所以決疑若黷禮慢先聖人所不用帝乃止麟德初權歷左奉宸衛將軍主坐巫蠱斥權房州刺史主從之官咸亨中主薨而權卒雙極還京師子顓封河東縣侯濟州刺史琅琊王沖起兵顓與弟紹以所部庸調作兵募士且應之沖敗殺都吏以滅口事泄下獄俱死

合浦公主始封高陽下嫁房玄齡子遺愛主帝所愛故禮異它壻主負所愛而驕房遺直以嫡當拜銀青光祿大夫讓弟遺愛帝不許玄齡卒主導遺愛異貲旣而反譖之遺直自言帝痛讓主乃免自是稍疏外主怏怏會御史劾盜得浮屠辯機金寶神枕自言主

所賜初浮屠廬主之封地會主與遺愛獵見而悅之具帳其廬與之亂更以二女子從遺愛私餉億計至是浮屠殊死殺奴婢十餘主益望帝崩無哀容又浮屠智昴迎占禍福惠弘能視鬼道士李晃高醫皆私侍主主使掖廷令陳玄運伺宮省祿祥步星次永徽中與遺愛謀反賜死顯慶時追贈

金山公主蚤薨

晉陽公主字明達幼字兕子文德皇后所生未嘗見喜慍色帝有所怒責必伺顏徐徐辯解故省中多蒙其惠莫不譽愛后崩時主始孩不之識及五歲經后所游地哀不自勝帝諸子唯晉王及主最少故親畜之王每出閣主送至虔化門泣而別王勝衣班于朝主泣曰兄今與羣臣同列不得在內乎帝亦爲流涕主臨帝飛白書下不能辨薨年十二帝閱三旬不常膳日數十哀因以癯羸羣

臣進勉帝曰朕渠不知悲愛無益而不能已我亦不知其所以然因詔有司簿主湯沐餘貲營佛祠墓側

常山公主未及下嫁薨顯慶時

新城公主晉陽母弟也下嫁長孫詮詮以罪徙雋州更嫁韋正矩爲奉冕大夫遇主不以禮俄而主暴薨高宗詔三司雜治正矩不能辯伏誅以皇后禮葬昭陵苑

高宗三女

義陽公主蕭淑妃所生下嫁權毅

高安公主義陽母弟也始封宣城下嫁潁州刺史王勗天授中勗爲武后所誅神龍初進册長公主實封千戶開府置官屬睿宗立增戶千薨開元時玄宗哭於暉政門遣大鴻臚持節赴弔京兆尹攝鴻臚護喪事

太平公主則天皇后所生后愛之傾諸女榮國夫人死后丐主爲道士以幸冥福儀鳳中吐蕃請主下嫁后不欲棄之夷乃真築宮如方士薰戒以拒和親事久之主衣紫袞玉帶折上巾具紛礪歌舞帝前帝及后大笑曰兒不爲武官何遽余主曰以賜駙馬可乎帝識其意擇薛紹尚之假萬年縣爲婚館門隘不能容翟車有司毀垣以入自興安門設燎相屬道樾爲枯紹死更嫁武承嗣會承嗣小疾罷昏后殺武攸暨妻以配主主方額廣頤多陰謀后常謂類我而主內與謀外檢畏終后世無它訾永淳之前親王食實戶八百增至千輒止公主不過三百而主獨加戶五十及聖曆時進及三千戶預詠二張功增號鎮國與相主均封五千而薛武二家女皆食實封主與相王衛王成王長寧安樂二公主給衛士環第十步一區持兵呵衛僭肖宮省神龍時與長寧安樂宣城新都定

安金城凡七公主皆開府置官屬視親王安樂戶至三千長寧二千五百府不置長史宜城定安非韋后所生戶止二千至三子崇簡崇敏崇行皆拜三品韋后上官昭容用事自以謀出主下遠甚憚之主亦自以軋而可勝故益橫於是推進天下士謂儒者多窶狹厚持金帛謝之以動大議遠近翕然嚮之玄宗將誅韋氏主與祕計遣子崇簡從事定將立相王未有以發其端者主顧溫王乃見子可劫以爲功乃入見王曰天下事歸相王此非兒所坐乃掖王下取乘輿服進睿宗睿宗卽位主權由此震天下加實封至萬戶三子封王餘皆祭酒九卿主每奏事漏數徒乃得退所言皆從有所論薦或自寒穴躡進至侍從旋踵將相朝廷大政事非關決不下間不朝則宰相就第咨判天子殆畫可而已主侍武后久善策人主微指先事逢合無不中田園徧近甸皆上腴吳蜀嶺嶠市

作器用州縣護送道相望也天下珍滋譎怪充于家供帳聲伎與天子等侍兒曳紈縠者數百奴伯姬監千人隴右牧馬至萬匹長安浮屠慧範畜貲千萬諸結權近本善張易之及易之誅或言其豫謀者於是封上庸郡公月給奉稍主乳媪與通奏擢三品御史大夫御史魏傅弓劾其姦贓四十萬請論死中宗欲赦之進曰刑賞國大事陛下賞已妄加矣又欲廢刑天下其謂何帝不得已削銀青階大夫辭謙光劾慧範不法不可貸主爲申理故謙光等反得罪玄宗以太子監國使宋王歧王惣禁兵主恚權分乘輦至光範門召宰相白廢太子於是宋璟姚元之不悅請出主東都帝不許詔主居蒲州主太望太子懼奏斥璟元之以銷戢怨嫌監察御史慕容珣復劾慧範事帝疑珣離間骨肉貶密州司馬主居外四月太子表追還京師時宰相七人五出主門下又左羽林大將軍

常元楷知羽林軍李慈皆私謁主主內忌太子明又宰相皆其黨
乃有逆謀先天二年與尚書左僕射竇懷貞侍中岑羲中書令蕭
至忠崔湜太子少保薛稷雍州長史李晉右散騎常侍昭文館學
士賈膺福鴻臚卿唐駿及元楷慈慧範等謀廢太子使元楷慈舉
羽林兵入武德殿殺太子懷貞幾至忠舉兵南衙爲應既有日矣
太子得其姦召岐王範王琮王兵部尚書郭元振將軍王毛仲殿中少
監姜皎中書侍郎王珣吏部侍郎崔日用定策前一日因毛仲取
內閑馬三百率太僕少卿李令問王守一內侍高力士果毅李守
德叩虔化門臬元楷慈於北闕下縛膺福內客省執義至忠至朝
堂斬之因大赦天下主聞變入南山三日乃出賜死于第諸子
及黨與死者數十人簿其田貲環瑤若山督子貨凡三年不能盡
崇簡素知主謀苦諫主怒撈掠尤楚至是復官爵賜氏李始主作

明板作不

觀池樂游原以爲盛集旣敗賜寧申岐薛四王都人歲祓禊其地

中宗八女

新都公主下嫁武延暉

宜城公主始封義安郡主下嫁裴與與有雙姝主恚削耳削鼻且

明板削

斷髮帝怒斥爲縣主與左遷久之復故封神龍元年與長寧新

寧義安安樂新平五郡主皆進封

安定公主始封新寧郡下嫁王同皎同皎得罪神龍時又嫁韋濯

濯卽韋皇后從祖弟以衛尉少卿與同皎太府卿崔銑主薨王同

皎子請與父合葬給事中夏侯鍤曰主義絕王廟恩成崔室逝者

有知同皎將拒諸泉銑或訴於帝乃止鍤坐是貶瀘州都督

長寧公主韋庶人所生下嫁楊慎交造第東都使楊務廉營總第

成府財幾竭乃擢務廉將作大匠又取西京高士廉第左金吾衛

明板太字

故營合爲宅右屬都城左頰大道作三重樓以馮觀築山浚池帝及后數臨幸置酒賦詩又并坊西隙地廣鞠場東都廢永昌縣主丐其治爲府以地瀕洛築鄣之崇臺蜚觀相聯屬無慮費二十萬魏王泰故第東西盡一坊瀦沼三百畝泰薨以與民至是主丐得之亭閣華詭埒西京內倚母愛寵傾一朝與安樂宜城二主后媚邨國崇國夫人爭任事賅謁紛紜東都第成不及居韋氏敗斥慎交絳州別駕主偕往乃請以東都第爲景雲祠而西京鬻第評木石直爲錢二十億萬開元十六年慎交死主更嫁蘇彥伯務廉卒坐贓數十萬廢終身

永壽公主下嫁韋鐵蚤薨長安初追贈

永泰公主以郡主下嫁武延基大足中忤張易之爲武后所殺帝追贈以禮改葬號墓爲陵

安樂公主最幼女帝遷房陵而主生解衣以祿之名曰褰兒姝秀辯敏后尤愛之下嫁武崇訓帝復位光艷動天下侯王柄臣多出其門嘗作詔符其前請帝署可帝笑從之又請爲皇太女左僕射魏元忠諫不可主曰元忠山東木強烏足論國事阿武子尚爲天子天子女有不可乎與太平等七公主皆開府而主府官屬尤濫皆出屠販納訾售官降墨敕斜封授之故號斜封官主管第及安樂佛廬皆憲寫宮省而工繳過之嘗請昆明池爲私沼帝曰先帝未有以與人者主不悅自鑿定昆池延袤數里定言可抗訂之也司農卿趙履溫爲繕治累石肖華山墜徠橫邪回淵九折以石瀼水又爲寶鑪鏤怪獸神禽間以琛貝珊瑚不可涯計崇訓死主素與武延秀亂卽嫁之是日假后車輅自宮送至第帝與后爲御安福門臨觀詔雍州長史竇懷貞爲禮會使弘文學士爲賓相王障

車捐賜金帛不貲翌日大會羣臣太極殿主被翠服出嚮天子再拜南面拜公卿公卿皆伏地稽首武攸暨與太平公主偶舞爲帝壽賜羣臣帛數十萬帝御承天門大赦因賜民酺三日內外官賜勲緣禮官屬兼階爵奪臨川長公主宅以爲第旁徹民廬怨聲囂然第成禁藏空殫假萬騎仗內音樂送主還第天子親幸宴近臣崇訓子方數歲拜太常卿封鎬國公實封戶五百公主滿孺月帝后復幸第大赦天下時主與長寧安定三家廝臺掠民子女爲奴婢左臺侍御史袁從一縛送獄主入訴帝爲手詔喻免從一曰陛下納主訴縱奴騶掠平民何以治天下臣知放奴則免禍劾奴則得罪於主然不忍屈陛下法自偷生也不納臨淄王誅庶人主方覽鏡作眉聞亂走至右延明門兵反斬其首追貶爲悖逆庶人睿宗卽位詔以二品禮葬之趙履溫詣事主嘗褫朝服以項挽車庶人死蹈舞承天門呼萬歲臨淄王斬之父子同刑百姓疾其與殺割取肉去

成安公主字秀姜始封新平下嫁韋捷捷以韋后從子誅主後薨睿宗十一女

壽昌公主下嫁崔真

安興昭懷公主早薨

荆山公主下嫁薛伯陽

淮陽公主下嫁王承慶

代國公主名華字華婉劉皇后所生下嫁鄭萬鈞

澆國公主字華莊始封仙源下嫁薛伯陽

薛國公主始封清陽下嫁王守一守一誅更嫁裴吳

鄆國公主崔貴妃所生三歲而妃薨哭泣不食三日如成人始封

荆山下嫁辟儼又嫁鄭孝義開元初封邑至千四百戶

金仙公主始封西城縣主景雲初進封太極元年與玉真公主皆爲道士築觀京師以方士史崇玄爲師崇玄本寒人奉太平公主得出入禁中拜鴻臚卿聲勢光重觀始興詔崇玄護作日萬人羣浮屠疾之以錢數十萬賂狂人毀謙冒入承天門升太極殿自稱天子有司執之辭曰崇玄使我來詔流嶺南且敕浮屠方士無兩競太平敗崇玄伏誅

玉真公主字持盈始封崇昌縣主俄進號上清玄都大洞三景師天寶三載上言曰先帝許妾捨家今仍叨主第食租賦誠願去公主號罷邑司歸之王府玄宗不許又言妾高宗之孫睿宗之女弟於天下不爲賤何必名繫主號貪湯沐然後爲貴請入數百家之產延十年之命帝知至意乃許之號寶應時

霍國公主下嫁裴虛已

玄宗二十九女

永穆公主下嫁王繇

常芬公主下嫁張去奢

孝昌公主蚤薨

唐昌公主下嫁辟鏞

靈昌公主早薨

常山公主下嫁辟譚又嫁甯澤

萬安公主天寶時爲道士開元新制長公主封戶二千帝妹戶千率以三丁爲限皇子王戶二千主半之左右以爲薄帝曰百姓租賦非我有士出萬死賞不過束帛女何功而享多戶邪使知儉嗇不亦可乎於是公主所稟殆不給車服後咸宜以母愛益封至千

戶諸主皆增白是著于令主不下嫁亦封千戶有司給奴婢如令上仙公主蚤薨

懷思公主蚤薨葬築臺號登真

晉國公主始封高都下嫁崔惠童貞元元年與衛楚宋齊宿蕭鄧紀鄧國九公主同徙封

新昌公主下嫁蕭衡

臨晉公主皇甫淑妃所生下嫁郭潛曜薨大曆時

衛國公主始封建平下嫁豆盧建又嫁楊說薨貞元時

貞陽公主下嫁源清又嫁蘇震

信成公主下嫁獨孤明

楚國公主始封壽春下嫁吳澄江上皇居西宮獨主得入侍興元元年請爲道士詔可賜名上善

普康公主蚤薨咸通九年追封

昌樂公主高才人所生下嫁寶鏗薨大曆時

永寧公主下嫁裴齊丘

宋國公主始封平昌下嫁溫西華又嫁楊徽薨元和時

齊國公主始封興信徙封寧親下嫁張垵又嫁裴穎末嫁楊敷薨

貞元時

咸宜公主貞順皇后所生下嫁楊洞又嫁崔嵩薨興元時

宜春公主早薨

廣寧公主董芳儀所生下嫁任昌胤又嫁蘇克貞薨大曆時

萬春公主杜美人所生下嫁楊肅又嫁楊錡薨大曆時

太華公主貞順皇后所生下嫁楊錡薨天寶時

壽昌公主下嫁郭液

樂城公主下嫁薛履謙坐嗣岐王珍事誅

新平公主常才人所生幼智敏習知圖訓帝賢之下嫁裴玲又嫁

姜慶初慶初得罪主幽禁中薨大曆時

壽安公主曹野那姬所生孕九月而育帝惡之詔衣羽人服代宗

以廣平王入謁帝字呼主曰燕娘汝後可與名王在靈州請封下

嫁蘇發

肅宗七女

宿國公主始封長樂下嫁豆盧洪

肅國公主始封寧國下嫁鄭元文嫁薛康衡乾元元年降回紇英

武威遠可汗乃置府二年還朝貞元中讓府屬更置邑司

和政公主章敬太后所生生三歲后崩養于韋妃性敏惠事妃有

孝稱下嫁柳潭安祿山陷京師寧國公主方棲梧主棄三子奪潭

馬以載寧國身與潭步日百里潭躬水薪主躬爨以奉寧國初潭

兄澄之妻楊貴妃姊也勢幸傾朝公主未嘗干以私及死撫其子

如所生從玄宗至蜀始封遷潭駙馬都尉郭千仞反玄宗御玄英

樓諭降之不聽潭率折衝張義童等殊死鬪主彀弓授潭潭手斬

賊五十級平之肅宗有疾主侍左右勤勞詔賜田以女弟寶章主

未有賜固讓不敢當阿布思之妻隸掖廷帝宴使衣綠衣為倡主

諫曰布思誠逆人妻不容近至尊無罪不可與羣倡處帝為免出

之自兵興財用耗主以賀易取奇贏千萬贍軍及帝山陵又進邑

入千萬代宗初立屢陳人間利病國家盛衰事天子鄉約吐蕃犯

京師主避地南奔次商於遇羣盜主諭以禍福皆稽顙願為奴代

宗以主貧詔諸節度餉億主一不取親紉裳衣諸子不服統絺

廣德時吐蕃再入寇主方姪入語備邊計潭固止主曰君獨無兄

乎人見內殿翌日免乳而薨

鄰國公主始封大寧下嫁張清薨貞元時

紀國公主始封宜寧下嫁鄭沛薨元和時

永和公主韋妃所生始封寶章下嫁王詮薨大曆時

郢國公主始封延光下嫁裴徵又嫁蕭升升卒主與彭州司馬李

萬亂而蜀州別駕蕭鼎澧陽令韋暉太子詹事李昇皆私侍主家

久之姦聞德宗怒幽主它第杖殺萬斤鼎暉昇嶺表貞元四年又

以厭蠱廢六年薨子位坐爲蠱祝囚端州佩儒偲囚房州前生子

駙馬都尉裴液囚錦州主女爲皇太子妃帝畏妃怨望將殺之未

發會主薨太子屬疾乃殺妃以厭災諡曰惠

代宗十八女

真定公主蚤薨追封

真定公主蚤薨追封

永清公主下嫁裴倣

齊國昭懿公主崔貴妃所生始封升平下嫁郭曖大曆末寰內民

訴涇水爲磴壅不得溉田京兆尹黎幹以請詔撤磴以水與民時

主及曖家皆有磴丐畱帝曰吾爲蒼生若可爲諸戚唱卽日毀由

是廢者八十所憲宗卽位獻女伎帝曰太上皇不受獻朕何敢違

還之薨元和時贈號國賜諡穆宗立復贈封

華陽公主貞懿皇后所生韶悟過人帝愛之視帝所喜必善遇所

惡曲全之大曆七年以病丐爲道士號瓊華真人病甚嚙帝指傷

薨追封

玉清公主早薨追封

嘉豐公主下嫁高怡與普寧公主同降有司具冊禮光順門以雨

下不克罷薨建中時

長林公主下嫁衛尉少卿沈明貞元二年具册禮德宗不御正殿不設樂遂為故事薨元和時

太和公主蚤薨追封

趙國莊懿公主始封武清貞元元年徙封嘉誠下嫁魏博節度使田緒德宗幸望春亭臨餞厭翟敞不可乘以金根代之公主出降乘金根車自主始薨元和時贈封及諡

玉虛公主蚤薨

普寧公主下嫁吳士廣

晉陽公主下嫁太常少卿裴液薨大和時

義清公主下嫁祕書少監柳杲

壽昌公主下嫁光祿少卿竇克良薨貞元時

新都公主貞元十一年下嫁田華具禮光順門五禮由是廢

西平公主蚤薨

章寧公主蚤薨

德宗十一女

韓國貞穆公主昭德皇后所生幼謹孝帝愛之始封唐安將下嫁祕書少監韋有未克而朱泚亂從至城固薨加封諡

魏國憲穆公主始封義陽下嫁王士平主恣橫不法帝幽之禁中

錮士平于第久之拜安州刺史坐交中人貶賀州司戶參軍門下

客蔡南史獨孤巾叔為主作團雪散雪辭狀離曠意帝聞怒捕南

史等逐之幾廢進士科薨追封及諡

鄭國莊穆公主始封義章下嫁張孝忠子茂宗薨加贈及諡

臨真公主下嫁祕書少監薛釗薨元和時

永陽公主下嫁殿中少監崔譔

普寧公主蚤薨

文安公主丐為道士薨大和時

燕國襄穆公主始封咸安下降回紇武義成功可汗置府薨元和時追封及諡

義川公主蚤薨

宜都公主下嫁殿中少監禰昱薨貞元時

晉平公主蚤薨

順宗十一女

漢陽公主名暢莊憲皇后所生始封德陽郡主下嫁郭縱辭歸策泣不自勝德宗曰兒有不足邪對曰思相離無他恨也帝亦泣顧太子曰真而子也永貞元年與諸公主皆進封咸近爭為奢諷事

明板有時字

三猶以儉常用鐵簪畫壁記田租所入文宗尤惡世流侈因主入

問曰姑所服何年法也今之弊何代而然對曰妾自貞元時辭宮

所服皆當時賜未嘗敢變元和後數用兵悉出禁藏織麗物賞戰

士由是散於人間內外相矜恚以成風若陛下示所好于下誰敢

不變帝悅詔宮人視主衣製廣狹徧諭諸主且敕京兆尹禁切浮

靡主嘗誨諸女曰先姑有言吾與若皆帝子驕盈貴侈可戒不可

恃開成五年薨

梁國恭靖公主與漢陽同生始封咸寧郡主徙普安下嫁鄭何薨

追封及諡

東陽公主始封信安郡主下嫁崔杞

西河公主始封武陵郡主下嫁沈翬薨咸通時

雲安公主亦漢陽同生下嫁劉士涇

襄陽公主始封晉康縣主下嫁張孝忠子克禮主縱恣常微行市里有辭樞辭渾李元本皆得私侍而渾尤愛至謁渾母如姑有司欲致詰多與金使不得發克禮以聞穆宗幽主禁中元本乃功臣惟簡子故貸死流象州樞渾崖州

尋陽公主崔昭儀所生太和三年與平恩邵陽二公主並爲道士歲賜封物七百匹

臨汝公主崔昭訓所生蚤薨

虢國公主始封清源郡主徙陽安下嫁王承系薨追封

平恩公主蚤薨

邵陽公主蚤薨

憲宗十八女

梁國惠康公主始封普寧帝特愛之下嫁于季友元和中徙永昌

薨詔追封及諡將葬度支奏義陽義章公主葬用錢四千萬有詔減千萬

永嘉公主爲道士

衡陽公主蚤薨

宣城公主下嫁沈蟻

鄭國溫儀公主始封汾陽下嫁韋讓薨追封及諡

歧陽莊淑公主懿安皇后所生下嫁杜悰帝爲御正殿臨遣繇西朝堂出復御延喜門止主車大賜賓從金錢開第昌化里疏龍首池爲沼后家上尚父大通里亭爲主別館貴震當世然主事舅姑以禮聞所賜奴婢偃蹇皆上還丐直自市悰爲澧州刺史主與偕從者不二十婢乘驢不肉食州縣供具拒不受姑寢疾主不解衣藥糜不嘗不進開成中悰自忠武入朝主疾侵曰願朝興慶宮雖

死於道不恨道薨

陳留公主下嫁裴損損爲太子諭德

真寧公主下嫁辟翊

南康公主下嫁沈汾薨咸通時

臨真公主始封襄城下嫁衛洙薨咸通時

普康公主蚤薨

真源公主始封安陵下嫁杜中立

永順公主下嫁劉弘景

安平公主下嫁劉異宣宗卽位宰相以異爲平盧節度使帝曰朕唯一妹欲時見之乃止後隨異居外歲時輒乘驛入朝薨乾符時永安公主長慶初許下嫁回鶻保義可汗會可汗死止不行太和

中丐爲道士詔賜邑印如尋陽公主故事且歸婚貲

義寧公主未及下嫁薨

定安公主始封太和下嫁回鶻崇德可汗會昌三年來歸詔宗正卿李仍叔祕書監李踐方等告景陵主次太原詔使勞問係塗以黠夏斯所獻白貂皮玉指環往賜至京師詔百官迎謁再拜故事邑司官承命答拜有司議邑司官卑不可當羣臣請以主左右上勝戴鬢帛承拜兩襜持命又詔神策軍四百具鹵簿羣臣班迓主乘輅謁憲穆二室欵獻流涕退詣光順門易服褫冠鑰待罪自言和親無狀帝使中人勞慰復冠鑰乃入羣臣賀天子又詣興慶宮明日主謁太皇太后進封長公主遂廢太和府主始至宣城以下七主不出迎武宗怒差奪封絹贖罪宰相建言禮始中壺行天下王化之美也請載于史示後世詔可

貴卿公主蚤薨

穆宗八女

義豐公主武貴妃所生下嫁韋處仁薨咸通時

淮陽公主張昭儀所生下嫁柳正元

延安公主下嫁竇滌

金堂公主始封晉陵下嫁郭仲恭薨乾符時

清源公主薨大和時

饒陽公主下嫁郭仲詞

義昌公主爲道士薨咸通時

安康公主爲道士乾符四年以主在外頗擾人詔與永興天長寧國興唐四主還南內

敬宗三女

永興公主

天長公主

寧國公主薨廣明時

文宗四女

興唐公主

西平公主

朗寧公主薨咸通時

光寧公主薨廣明時

武宗七女

昌樂公主

壽春公主

長寧公主薨大中時

延慶公主

靜樂公主薨咸通時

樂溫公主大和

永清公主薨咸通時

宣宗十一女

萬壽公主下嫁鄭顥主帝所愛前此下詔先王制禮貴賤共之萬壽公主奉舅姑宜從士人法舊制車輿以鏤金鈿飾帝曰我以儉率天下宜自近始易以銅主每進見帝必諄勉篤誨曰無鄙夫家無忤時事又曰太平安樂之禍不可不戒故諸主祇畏爭爲可喜事帝遂詔夫婦教化之端其公主縣主有子而寡不得復嫁

永福公主

齊國恭懷公主始封西華下嫁嚴祁祁爲刑部侍郎主薨大中時追贈及諡

廣德公主下嫁于琮初琮尚永福公主主與帝食怒折匕飭帝曰此可爲士人妻乎更許琮尚主琮爲黃巢所害主泣曰今日誼不獨存賊宜殺我巢不許乃縊室中主治家有禮法嘗從琮貶韶州侍者纔數人郤州縣饋遺凡內外冠婚喪祭主皆身答勞疏戚咸得其心爲世聞婦

義和公主

饒安公主

盛唐公主

平原公主薨咸通時已而追封

唐陽公主

許昌莊肅公主下嫁柳陟薨中和時

豐陽公主

懿宗八女

衛國文懿公主郭淑妃所生始封同昌下嫁韋保衡咸通十年薨
帝既素所愛自製挽歌羣臣畢和又許百官祭以金貝寓車歔服
火之民爭取煨以汰寶及葬帝與妃坐延興門哭以過輅仗衛彌
數十里冶金爲俑怪寶千計實墓中與乳保同葬追封及諡

安化公主

普康公主

昌元公主薨咸通時

昌寧公主

金華公主

仁壽公主

永壽公主

僖宗二女

唐興公主

永平公主

昭宗十一女

新安公主

平原公主積善皇后所生帝在鳳翔以主下嫁李茂貞子繼俛后
謂不可帝曰不爾我無安所是日宴內殿茂貞坐帝東南主拜殿
上繼俛族兄弟皆西向立主徧拜之及帝還朱全忠移茂貞書取
主還京師

信都公主

益昌公主

唐興公主

德清公主

太康公主

永明公主蚤薨

新興公主

普安公主

樂平公主

贊曰婦人內夫家雖天姬之貴史官猶外而不詳又僖昭之亂典策埃滅故諸帝公主降日薨年粗得其槩亾者闕而不書

諸公主列傳第八終

萬川宅鳳臺氏書

唐書八十三

